



# 澳門特別行政區 立法會會刊

## DIÁRIO DA ASSEMBLEIA LEGISLATIVA DA REGIÃO ADMINISTRATIVA ESPECIAL DE MACAU

第四屆立法會 第四立法會期（二零一二—二零一三）  
IV LEGISLATURA 4.ª SESSÃO LEGISLATIVA (2012-2013)

第一組 第 IV-109 期  
I Série N.º IV-109

日期：二零一三年八月十五日

開始時間：下午三時正

結束時間：下午六時正

地點：澳門南灣湖畔立法會前地立法會大樓全體會議廳

主席：劉焯華

副主席：賀一誠

第一秘書：崔世昌

第二秘書：高開賢

出席議員：劉焯華、賀一誠、崔世昌、高開賢、馮志強、  
關翠杏、歐安利、吳國昌、張立群、徐偉坤、  
陳澤武、鄭志強、區錦新、黃顯輝、吳在權、  
高天賜、崔世平、梁安琪、陳明金、李從正、  
何少金、劉永誠、林香生、麥瑞權、陳偉智、  
蕭志偉、何潤生、陳美儀、唐曉晴。

列席者：行政長官崔世安

行政法務司司長陳麗敏

保安司司長張國華

社會文化司司長張裕

運輸工務司司長劉仕堯

廉政專員馮文莊

審計長何永安

海關關長徐禮恆

行政長官辦公室主任譚俊榮

行政法務司司長辦公室主任張翠玲

經濟財政司司長辦公室主任陸潔嫻

保安司司長辦公室主任黃傳發

社會文化司司長辦公室主任張素梅

運輸工務司司長辦公室主任黃振東

廉政專員辦公室主任沈偉強

審計長辦公室主任何慧卿

行政會委員梁慶庭

行政會委員廖澤雲

行政會委員馬有禮

行政會委員梁維特

行政會委員何雪卿

行政會委員黃如楷

行政長官私人助理譚嘉華

**議程：**議員就政府施政及社會問題向行政長官提問及行政長官  
回答有關問題。

**簡要：**行政長官回答了議員就政府施政及社會問題所提的有關  
問題。

**會議內容：**

**主席：**行政長官閣下、各位官員、行政會成員、各位議  
員、各位傳播界嘅朋友：

現在我哋開會喇。

午安。

今日嘅議程呢係行政長官出席立法會會議，答覆議員就政策方面嘅提問。咁首先請陳明金議員提問。

**陳明金：**多謝主席。

行政長官閣下：

近年來，政府通過調整公務員嘅職程、薪酬、津貼等制度，回應咗公務員內部嘅部分訴求，但係，一啲老問題仍然存在。比如，幾千名散位嘅公務員嘅年資獎金問題，現行法律係從 2007 年開始計算，而唔係以實質在公職服務嘅時間為準。一啲為澳門服務咗二、三十年嘅公務員，目前，只能夠攞到 2007 年至 2012 年嘅一份年資嘅獎金。多年來，為咗能夠獲得與退休及撫恤制度公務員同樣嘅待遇，佢哋一直努力爭取。又比如，回歸以來，政府先後六次調整公務員嘅薪酬，但係，現行嘅調薪制度，只係增加點數，基層公務員由於薪俸點比較低，實際增加嘅薪金就比較少。長期落去，高點數嘅官員同基層公務員之間薪金嘅差距，就會越來越大。

公務人員體制內嘅不平等嘅待遇，容易形成對立、積累怨氣，打擊工作積極性。請問行政長官閣下，就基層公務員年資獎金嘅訴求，點樣睇？點樣解決？點樣改革公務員嘅薪酬調整機制，改善公務員內部薪酬差距越來越大嘅問題？

多謝。

**行政長官崔世安：**多謝陳明金議員嘅問題。

主席、陳議員：

關於基層公務員所關心嘅問題呢，其實特區政府，特別我哋管理嘅團隊呢，亦都係非常關心嘅，喺近來呢，亦先後呢，包括咗同我哋嘅同事，陳司長嘅範疇，同埋有關負責嘅部門嘅主管，以至到一啲公務員嘅朋友、公務員嘅團體呢，亦都係交換咗意見。團體亦多次呢係提出咗訴求，係關心基層嘅公務員。

我哋回顧過去，係回歸前到喺回歸之後，剛才陳議員亦都

講咗，有一定嘅改善，亦都係提案咗，一系列，喺立法會亦都獲得通過。我諗大家特別關心嘅係公積金嘅制度啦，同時今日亦都問到關於呢個 2/2001 號年資獎金、房屋津貼及家庭津貼嘅制度。咁我哋回顧返喺呢個年資獎金裏面呢，我諗一個大家好關心嘅，實際嘅工作嘅年資，一個呢係供款嘅時期。咁喺呢個過程之中呢，其實立法會呢亦都做咗大量嘅工作，當時呢亦都係喺呢個意見書呢係有表達到關注，最後呢達到呢個共識，喺睇到整個事呢係向前都推進咗一步。亦都係喺個金額，如果有記錯呢，從呢個 190 蚊去到 500 蚊，份數呢每 5 年嘅累積呢亦都係改變咗，喺整體疊上去嘅時候呢，係向前邁進咗。

咁至於近期，大家亦都好關心到，由於物價嘅高漲，由於基層公務員所受到嘅經濟壓力，咁我哋亦都關心到喺過往大家常講及嘅長俸制度啦、退休撫恤制度，喺 06、07 執行嘅公積金制度裏面，其實新嘅制度呢係包括咗好多過去未能夠喺舊制度裏面呢獲得嘅公務員嘅同事，咁一方面我相信亦都解決咗一定嘅問題。但係，對於公務員體制內唔盡公平嘅問題呢，我哋係會十分關注。呢啲有長期嘅、有複雜嘅，但係作為特區政府呢，我哋相信我哋唔能夠迴避，亦唔會退縮。借今日呢個機會呢係可以同大家講，我哋將會加快研究分析，爭取來到去解決呢啲可行嘅方案。

另一方面，亦都係近期收到多個公務員團體好，特別關心基層公務員嘅議員朋友好，談到呢個遠水難救近火嘅困境，咁我哋呢亦都充份考慮到喺未來嘅一段時間呢，係靈活措施點樣去紓緩低收入嘅公務人員嘅經濟壓力，係研究呢向立法會提出呢調整現行嘅一啲福利嘅津貼，超時工作補償，去增加基層公務員嘅收入；亦都研究考慮向收入低嘅人員呢，經濟有困難嘅人員呢，提供生活補助嘅津貼，去幫助生活上有特殊困難嘅公務人員。其他有助於逐步切實改善基層公務員嘅待遇、措施同埋方案呢，都係喺研究之中。咁呢個我相信呢陳司長呢係佢範疇裏面呢亦都係會呢加快做呢個工作，呢個特區政府嘅基本上已經統一咗呢係去咁樣做。即使唔能夠做到一次解決所有問題，但係都會好認真確實逐步呢去改進嘅。

總嘅來講，公務人員嘅團隊係特區政府寶貴嘅資產，亦係我哋整個團隊施政嘅基礎。政府一直高度重視全體公務人員嘅薪酬福利待遇問題。我哋亦將不斷檢討完善現有嘅法律制度，切實去回應各種合理嘅訴求。採取有效靈活嘅措施，積極促成咗全體公務人員平等待遇嘅目標，希望能夠呢喺未來得以實現。

多謝主席。

**何少金：**多謝主席。

尊敬嘅行政長官閣下：

咁明年嘅就係澳門特別行政區呢成立 15 周年。咁回顧呢十多年來呢，其實澳門不論嘅政治、經濟、文化、教育呢等個方面呢，都有咗長足嘅發展。咁而呢一個澳門呢要保持呢個持續發展嘅優勢同埋競爭力呢，可能人才培養呢係最重要嘅。咁然啦人才培養呢就要靠我哋有呢個前瞻性嘅教育政策同埋良好嘅教育制度。而 15 年免費教育呢，下一個階段我哋就係要整體去提升教育嘅質量，來到全面呢培養更多嘅澳門所需要嘅人才。

咁所以喺呢一度呢，我就想問一下行政長官閣下，即係話喺未來明年，喺教育施政個方面，尤其是面對高等教育、基礎教育同埋成人教育等嘅方面，會有一啲咩重點嘅教育政策呢咁？咁而大家都比較關心嘅持續發展呢個進修計劃，又未來會點樣更好咁配合整個澳門個學習型嘅社會呢咁？

多謝。

**行政長官崔世安：**多謝何少金議員。

主席、各位議員：

明年係特區成立嘅 15 周年，亦係特區政府運作咗 15 年。喺呢 15 年裏面，特區政府呢係高度重視教育，亦都喺政策資源上呢，放喺好重要嘅位置。大家回歸返呢十幾年呢，喺教育上呢亦取得咗一定嘅進步。

剛才何少金議員談到嘅幾方面呢，我嘗試去講一講。

首先喺談到呢個非高等教育。15 年嘅非高等教育呢已經落實執行，亦都係呢通過咗私樞嘅法律制度，同時呢我哋亦都邁向呢個小班制。喺現在來講，15 年嘅免費教育呢係象徵咗我哋非高等教育裏面呢，合齡嘅係唔會呢係有呢一個接受教育嘅機會，亦都係提供咗適當嘅教育機會。但係喺呢個過程之中，我相信未來大家都好關心嘅除咗個量之外呢，就係我哋質嘅問題。喺呢個嘅教學質量裏面，大家，關心嘅議員好，教育界嘅朋友好，亦都多次提及到呢我哋畀班率比較高啦，我哋因為我哋嘅教學嘅質量啦，以致點樣能夠推動向一個更好嘅發展。

所以我相信喺非高等教育裏面呢，我哋除咗現在已經經過咁多年嘅努力所取得嘅好嘅基礎呢，未來嘅發展我相信呢喺係呢個量方面呢，要更加去關注同埋投入。呢個呢我相信包括咗政府嘅政策，包括咗學校嘅行政，包括咗老師嘅培訓同再培訓，亦都係包括咗呢家長點樣去配合、去支持好自己嘅兒女作為學生。咁喺呢方面我相信呢喺幾個方面呢都會係加大投入。大家亦知道私樞通過咗之後呢，對老師嘅持續培訓呢，呢個係相當重要。點樣掌握現代教學嘅方法，點樣令到呢能夠與時俱進，亦都呢更好咁樣教育好我哋下一代。學校方面呢我哋亦都呢喺硬件呢、軟件呢加大支持，亦都希望能夠呢配合到現代教學嘅設備。

另一個問題，我諗大家亦都好關心喺非高等教育裏面就係回歸教育。回歸教育呢我覺得係好重要，因為我哋能夠提供到第二次嘅機會俾未能夠完成非高等教育嘅澳門居民。因為好多都係在職或者過去呢未能夠完成，所以喺呢一方面呢亦都非常重要，特別呢係有利於本地人呢去提升。因為現在來講呢非高等教育嘅完成呢已經係一個好基本，我哋差唔多必需嘅條件，來到呢去晉升好、進修好，嚟到去進入高等教育學習好。所以我相信呢幾方面呢，我哋會加強嘅。

喺高等教育方面，大家都知道澳門大學橫琴新校區基本已經建成，亦都係呢根據相關嘅法律制度呢係已經呢正式由澳門特別行政區去管理。喺未來嘅一段時間呢將會呢係逐步呢係搬往新校區呢去完成咗呢個完全搬遷，之後舊嘅校址呢亦都唔會呢係作商廈用途、商業用途，亦都係呢係一定會呢提升澳門人素質方面，俾澳門人能夠有更好嘅機會同埋空間去用。

我諗高等教育頭先大家都好關心到呢，我都講兩個方面，一方面係要支持澳門經濟適度多元呢去培訓人才，另一個方面呢亦係整體澳門呢整個地區發展呢嘅高等教育水平嘅提高，所以呢個亦包括咗呢個數量同質量。咁現在來講呢喺澳門完成中學，升高等院校呢已經係相當高嘅比例，亦都係呢提供咗好多機會，所以只要能夠用心讀書，完成呢個高等教育呢係喺澳門真係可以實現嘅。

咁我哋除咗支持好澳大之外呢，亦都係同所有高等院校呢係大家去商議，點樣能夠培訓更多澳門未來需要嘅人才，來到做好呢個高等教育嘅培養。

至於喺持續進修方面呢，張裕司長亦都宣佈咗第一階段之後呢我哋會延續，咁至於喺呢個檢討之後，明年我相信會擺喺

施政方針裏面呢，繼續呢個持續進修。量，我哋睇到好大亦都係投入咗，但係喺一個新嘅過程之中呢，我覺得亦係需要檢討，同埋點樣能夠更好呢係服務好澳門市民，喺持續進修方面。

咁總嘅來講，我覺得整個教育政策呢，依然係施政嘅重點，明年嘅施政亦都會呢投下更多嘅資源呢喺教育方面，特別從呢個非高等教育、回歸教育、高等教育以至到持續進修。咁我相信呢以過去打下嘅基礎呢，我哋未來呢對教育方面嘅投入同埋政策嘅支持呢，使到辦學嘅團體呢能夠呢具備更好嘅條件，培訓更多呢適合澳門發展適度多元嘅人才。

多謝主席。

**主席：**陳澤武議員。

**陳澤武：**多謝主席。

行政長官閣下、各位官員、各位同事：

近日有傳媒報道指，經濟財政司譚司長表示呢，特區政府將於 2015 年開始探討博彩業賭牌公司嘅專營合約嘅續約問題，引起社會普遍嘅關注同埋討論。博彩業嘅係澳門嘅歷史行業，亦都連繫著澳門未來嘅發展嘅路向。國家規劃澳門建設為世界級嘅旅遊休閒城市，而發展好嘅個龍頭產業呢係具十分重要嘅意義。我想請行政長官閣下係用今日少少嘅時間，談一談特區政府喺上述問題嘅宏觀政策嘅思考，以利用於社會嘅討論同埋集思廣益。

多謝。

**行政長官崔世安：**多謝主席。

主席、各位議員：

多謝陳澤武議員嘅問題。我諗博彩業係澳門嘅支柱產業，產值佔 GDP 嘅重要比重呢大家都好清楚。而博彩稅收呢亦係特區主要嘅收入來源，為政府改善民生、提高社會福利呢，亦係提供咗堅實財政基礎。喺過去呢段時間，特別係賭權開放之後呢，經濟呢個高速增長呢，博彩業事實上係佔咗好重要嘅位置。同埋睇而家嘅發展呢，我相信喺未來嘅一段時間博彩業依然係佔一個好重要嘅位置。

剛才陳議員亦都談到澳門已經定位作為世界旅遊休閒中心，對葡語系國家經貿服務平台。呢個作為一個中心、一個平台呢係我哋整個發展嘅路向。所以我覺得喺未來博彩業嘅發展呢同喺剛剛呢個博彩業嘅發展呢，係可能有一定嘅分別。因為過去取得咗好大嘅經濟成果，但係一個傾斜嘅事業發展呢，亦會帶嚟呢一定嘅問題，喺呢啲問題裏面，行咗咁多年呢大家亦睇到，正如我哋睇咗好多專家學者，亦做咗好多嘅研究，談到澳門嘅博彩業發展所取得嘅成就，亦都係呢可能影響咗其他事業嘅發展，或者對整個澳門嘅定位發展。咁我諗而家係一個好嘅時候呢係去回顧過去、展望將來。政府亦都係請咗澳門大學有關嘅研究機構呢進行咗呢個大概十年嘅回顧，從一個比較宏觀嘅角度呢去睇博彩業嘅發展所帶嚟嘅後果。但係，未來嘅發展我相信因為已經發展到一定嘅規模，特別喺呢幾年呢，我哋已經先後對呢個博彩業嘅營運者所承諾嘅土地相繼已經批出，亦都係在建之中，相信未來嘅一段時間呢，可能，已經係，大家睇到，一路到 2016 呢，呢啲相繼落成之後呢，澳門嘅博彩業呢個規模呢比現在係更大。

但係，我哋有幾點要關心嘅，就係博彩業嘅規模去到一定嘅時候呢，到底整個地區嘅經濟發展同埋個定位點樣去配合。剛才談到定位已經係一個中心、一個平台，我哋就係希望呢以博彩業作為主呢，但係喺呢個經濟適度多元裏面呢，博彩業嘅發展，大家睇到未來所建成嘅都係綜合項目，所以個非博彩嘅元素呢係佔相當大嘅比例。我哋亦都係希望能夠呢將呢個非博彩嘅元素呢係逐漸增加。特別係喺呢幾年裏面呢，大家亦都睇到，因為博彩業嘅發展呢，澳門多個與博彩有關嘅非博彩行業呢亦取得咗一定嘅經濟成就。大家睇到包括咗酒店、餐飲、零售等等都係因為與博彩業相關呢係取得咗好大嘅進展，呢個呢亦都係應該繼續去發展。

但係，另一個方面呢，就係經濟適度多元方面，我哋現在要發展嘅事業呢，點樣利用呢個博彩業嘅發展呢來到去支撐多元發展。因為博彩業發展係一個比例佔得咁重，同埋現在已經咁多嘅從業員呢，大家睇到但未來一段比較長嘅路，都係博彩業呢作為主要嘅來源，特別喺財政收入方面。所以我哋希望係將咁多年積累咗呢，能夠除咗保持呢個博彩業嘅繼續發展，亦都係希望其他非博彩元素發展，以至到呢經濟適度多元嘅發展。咁喺呢幾方面我覺得係一個比過去更好嘅條件，澳門係向前嘅。

大家好關心到博彩業嘅個合約到期嘅問題。前一段時間譚伯源司長亦都公開表示咗佢認為 15 年呢係一個比較適合嘅時間

呢來到去研究呢啲博彩嘅合同。咁大家都好清楚博彩相關嘅法律，同埋呢到期來講係 2020 同埋 2022 嘅，所以呢相對仲係有足夠嘅時間呢來到呢係去研究。亦都相信呢係下一屆政府呢一個好重要嘅工作，係去研究關於呢啲博彩嘅合同。但係目前來講呢，我相信仲係要重視，完成咗呢啲綜合項目裏面博彩同非博彩元素。更重要呢就係本地人嚟呢啲新嘅裏面呢能夠有進修晉升嘅機會，特別嚟管理層方面。因為我哋無論教育政策好、持續進修好或者在職兼讀培訓好，我哋都好希望呢企業俾到機會澳門嘅人能夠得到提升，做一啲更重要嘅管理層嘅位置，所以呢個我相信呢係更重要。

多謝主席。

**主席：**關翠杏議員。

**關翠杏：**多謝主席。

長官閣下：

我想講嘅係房屋問題。由於而家嘅私人樓價係超越咗市民嘅承受能力，其實成個社會大家都希望將居住嘅期望放喺公共房屋。有一啲低收入嘅居民同我講，論收入佢哋係有條件申請社屋，但係根據而家新嘅規定呢，社會房屋佢亦都有一個叫資產上限。作為呢啲居民呢辛辛苦苦打咗幾十年工，儲起嘅錢係超出咗十六萬幾呢個規定，佢唔可以申請社屋，但係收入又不夠條件買經屋，因為有七千幾蚊嘅收入嘅下限。咁呢啲居民呢，而家佢嘅租屋呢，一半嘅人工都唔可以租到屋，佢哋就覺得政府完全冇諗過佢哋呢啲居民嘅痛苦。

我所以呢我就想問，政府喺設定呢一個限制嘅時候，有冇諗過會出現呢啲情況？而家呢個《經濟房屋法》面對咁嘅情況有冇考慮過修改？點樣幫呢一啲又申請不到經屋，又排唔到社屋，亦都有辦法租住私人樓宇嘅居民？另一個，經濟房屋設定咗上下限之後，唔單止排除咗一啲基層低收入嘅居民，亦都令到一啲收入高一啲嘅，但亦都有辦法喺私人樓宇市場上面可以購買到或者租住到私人樓宇嘅呢啲居民，點樣幫佢哋呢？我希望特首可以講一講。

**行政長官崔世安：**多謝關翠杏議員。

主席、各位議員：

我諗房屋呢其實係特區政府非常之重視嘅，特別廣大居民嘅居住權。亦都喺過去這三年，盡咗好大努力嚟呢個公共房屋政策裏面呢，建成咗，大家都好關心嘅萬九公屋，亦都接住來呢係繼續興建。

我諗剛才關議員所講嘅呢，我嘗試喺兩個層面去答。因為我嘅理解來講，公共房屋政策，社屋為主、公屋為輔。經屋嘅申請收入下限，係社屋申請收入嘅上限。同埋喺三個唔同嘅層面裏面，即社屋、經屋、私人房屋裏面嘅銜接呢，剛才提到係有一啲澳門嘅居民呢佢冇法子買到經屋呢個問題。咁但係，大家都知道，呢個經屋法係通過咗，亦都係有呢個上下限，呢個我相信係經過諮詢，亦係立法會廣泛討論，工作委員會最後達成咗，全體會議通過嘅法律條文，但係個問題我諗任何一個制度，佢行咗一段時間，或者佢個制度本身，都未必可能照顧晒所有嘅人。呢個我覺得每一個制度行咗之後有檢討必要嘅，呢個我諗唔係單係澳門，唔同嘅國家地區佢執行法律嘅可操作性嘅時都可能會有。但係，呢一個問題呢，我覺得其實我哋而家呢係研究咗係越來越闊。第二個層面我想講嘅就係，有社屋，有經屋，有私人房屋，我哋現在又研究緊澳人澳地，特別將一啲土地係俾澳門人。咁喺呢個情況之下，亦都係經過上一次嘅修改之後呢，如果我有記錯，而家係大概覆蓋八成入係可以喺呢個經屋條件嘅。當然呢個係當時我哋特區政府公佈過嘅，呢個劉司長方面呢亦都做過好多研究。咁我諗喺檢討同評估有關措施嘅成效嘅時候，我哋係咪需要比較睇得闊一啲？因為上下限，基本上呢係一個已經覆蓋咗咁闊，如果我哋撤銷咗上下限，我嘅理解就係我哋要修訂呢個法律，重新呢去設定個條文。而呢個法律呢係應該係 2011 年，因為係 10/2011 號法律，咁喺呢個情況之下呢，可能要重新去睇整個市場。

但係睇整個市場嘅現狀，我覺得最重要係土地。其實，有土地來講呢，係會解決好多問題，包括咗公共房屋，包括咗澳人澳地嘅研究，亦都包括咗呢私營房屋。如果建到更多供應量，夠供求嘅關係，能夠得到一定嘅平衡嘅時候。喺 2015 我哋嘅填海造地，而家就積極已經做緊，係希望呢一個土地能夠去研究。咁到底而係係咪適當一個時間我哋撤銷咗呢？我自己係有保留。

但係，我亦都好明白，因為同關議員亦多交流過好多次，好多譬如年青人嘅希望啦，同埋好多認為佢有能力買私人房地產，咁亦都希望呢個經屋呢越拉越闊，即係能夠蓋過咗澳門好大比例嘅人都有條件去買經屋，咁呢兩個我自己係理解嘅。因為好似過往咁，我哋自己都做過年青人，過往年青人就

有咁急希望自己有套房，通常都係同爸爸媽媽住一段時間之後嘅。當然文化嘅改變我有意見去評論，因為如果與時俱進大家都係咁樣諗嘅，呢個係文化上大家思維上嘅改變，對家庭嘅觀念，自己組織新嘅地方去住。

但係，關係係你有一個合理嘅期望，我哋能夠俾到佢，而唔是一個遙不可及嘅，佢嘅經濟能力負擔唔到，我諗呢個這係關係到個土地。所以我係比較認同呢，喺新嘅填海造地裏面呢，我哋睇呢個澳人澳地嘅研究。目前劉司長嘅促進小組已經係請咗兩個高等院校進行研究，亦都呢我相信好快有報告之後公開諮詢，到底睇吓澳門人佢哋對呢一個澳人澳地嘅睇法。但係喺這段時間，我自己亦都聽咗好多意見呢，係有贊成亦有反對嘅，因為呢種係一種新嘅概念。一種認為公共房屋已經係澳人澳地，點解要打開一個新嘅路呢，而呢一個新嘅路呢可能受市場影響？地產高嘅時候可能係一個好嘅出路，但係當地產回落嘅時候，又可能係另一個景象。亦都對呢個競爭力同埋公平不公平呢係產生一個新嘅問題。所以我覺得係咪等呢兩個研究完成之後，我哋公開，再做一個公開嘅諮詢，睇睇廣大居民對呢個澳人澳地嘅睇法，可能比較客觀一啲。

但係，我好明大家關心到，特別係唔設呢個上下限嘅時候，所有都可以去購買，具備基本條件嘅問題，但係由於個法律條文當時已經係明確咗，咁我諗喺適時嘅時候會檢討，但係最重要我諗都仲係需要我哋有土地嘅。咁我亦都睇過好多朋友仲係好關心我哋閒置嘅地會唔會去做公屋。閒置嘅地到今日我再檢視過呢，係經我手已經簽出啟動程序失效收嘅呢有二十八幅。另一個呢，亦好多朋友諮詢，好多唔同嘅團體呢，關於機場對面嘅土地呢，我亦都再同法律顧問同劉司探討過呢，目前事實上係喺一個法律訴訟裏面嘅。呢個呢特區政府已經正式宣佈咗呢個土地要收回，但係目前呢係喺一個法律程序裏面嘅。我諗程序完成係可以公開嘅，呢個亦都有……暫時特區真係有計劃呢塊土地係點樣用。因為諮詢過法律意見呢，係要完成咗呢個程序嘅。

多謝。

**主席：**林香生議員。

**林香生：**多謝主席。

行政長官閣下：

廣大嘅澳門居民要求特區政府改變傳統嘅行政方式同管理文化，建立責任政府同服務政府嘅訴求日見增加。然而，喺行政主導體制之下，行政權力所受到嘅外部制約同監督相對較弱，加之歷史上澳門嘅行政機構從來欠缺問責文化。我個人認為，問責制度係政治文明建設嘅一個重要組成部分，係建設責任政府、法治政府、民主政府嘅一個重要途徑。

問責是由授權產生嘅，澳門官員問責制度嘅核心設計在於授權制度嘅獨特性。我哋睇到，第三屆特區政府開始以制訂官員問責規範來推進官員問責制度建設。尤其喺 2009、2010 兩年內集中推出咗多項與官員問責制度相關嘅法律規範，為建立特區政府官員問責制度奠定了基本嘅法律基礎。

我嘅問題係：從呢幾年嘅實踐中，問責制度有啲咩得著？喺預防官員失職失責行為發生，有利於避免政府職能嘅官僚化，喺懲處濫用職權、玩忽職守嘅違法行政行為嘅同時，又要有效杜絕無所作為嘅行政行為，喺問責環節上既著重於執行環節，又唔放鬆決策同監督環節。對上述呢啲問責制度息息相關嘅內容，長官閣下，你有啲咩見解同構想？

**行政長官崔世安：**多謝林香生議員。

主席、各位議員：

官員問責嘅制度呢嚴格來講係官員嘅責任制度。特區政府嘅官員包括咗主要官員、領導嘅官員、主管人員。回歸之後呢係頒布咗一系列規範各級官員責任嘅法律法規，亦都形成咗一個官員責任嘅法律體系。

喺回歸嘅初期，2/1999 號法律《政府組織綱要法》中，明確咗主要官員係向行政長官負責。與該法配套嘅行政法規《政府部門及實體的組織、職權與運作》，亦規定咗五位司長嘅職權範圍，從而建立咗呢當時最早嘅官員問責制嘅框架。經過十多年嘅經驗累積，特區政府亦頒布咗主要官員通則、主要官員嘅守則，更加明確規定咗主要官員喺政治上呢係向行政長官負責，但呢種政治責任構成咗高官問責嘅內容，主要嘅官員呢依然係需要承擔民事、刑事、行政、財政嘅責任。

喺目前來講，我諗大家好關心主要官員嘅問責，因為佢係要向行政長官負責。咁但係喺而家嘅制度裏面呢，基本上如果要問責呢，我想，一個係做咗一定嘅事，喺過程之中係發覺出現咗問題，佢承擔嘅責任。舉個例，係道歉啦，一個呢就係自

已嘅辭職，另一個呢就係由行政長官向中央提出終止職務。我諗如果目前來講，喺呢個制度裏面，我哋時常都睇，但係，喺實際嘅運作來講，我哋經過一段時間呢，亦都好關心到係咪點樣一邊喺運作裏面一邊我哋吸收經驗，去完善呢啲制度，有其他嘅選擇，呢個係我哋一路呢好關心去做嘅問題。

對高官問責嘅制度，我們係需要準確去理解咗，就係特區嘅政治體制以及佢整體運作嘅層面理解。高官問責係盡可能避免成為有損社會和諧穩定同埋政府依法施政嘅負面因素。所以主要官員嘅責任規範外呢，我哋亦要針對領導及主管人員制定相關嘅法律法規。

從長遠來講，我哋應該將政府官員嘅責任規範，同政府績效管理制度結合起來，透過法定規範、科學嘅規則同埋機制呢更有效去落實。對於領導官員嘅績效評核，現在我哋經過一段時間，行政暨公職局，政研室等等一齊去工作，有咗一個基本，就係基本原則啦、評核主體啦、組織體制啦、指標體制及運作程序等，初步呢係完成咗設計，亦都按施政希望喺今年能夠落實去實施。

責任嘅意識及問責嘅文化培育，對改進政府嘅作風、提升施政目標呢，我相信係起到作用，政府對呢個呢係採取一個好積極嘅態度呢係去面對。所以我哋係明白到社會好關心。特區政府係一個服務型、責任型嘅政府，亦都希望呢我哋能夠漸進去到一個新嘅負責任嘅文化。咁呢個我哋一定會呢除咗積累經驗之外呢，係加緊去做好一啲相關工作。

多謝主席。

**主席：**劉永誠議員。

**劉永誠：**多謝主席。

尊敬嘅行政長官閣下：

經過去一屆立法會同當局嘅努力，土地法、城規法、文遺法、樓花法同埋呢個房地產中介業務法等一系列嘅法案終於先後趕及喺會期結束前，獲大會細則性通過，意味住未來澳門無論土地利用、城市規劃、樓宇買賣等各方面，均將有一套嚴謹嘅運作標準同埋規範作為一個依從。因此本人想請問行政長官閣下，當局未來將有邊一啲嘅相關配套嘅法例會相繼咁推出，以配合現時澳門嘅社會同埋經濟嘅發展，以及國際休閒中

心嘅定位呢，好讓社會各界能夠及早知悉，以期更好咁適應同埋作出適當嘅準備？

多謝。

**行政長官崔世安：**多謝劉永誠議員。

主席、各位議員：

土地管理、城市規劃、文遺保育，房地產交易規範嘅發展，係關係到澳門嘅可持續發展，呢個亦係長期社會嘅關注。政府高度重視業界嘅訴求，與時並進推出一系列嘅法律法規嘅提案，推動社會向前，來到配合呢整個城市嘅發展。喺檢討土地方面呢，係確保咗土地資源有效合理使用，訂立咗城市規劃法，亦係統籌協調城市空間資源嘅配置。制訂咗文遺法，係推動咗澳門文化遺產保護嘅工作。土地法除確保土地資源有效合理嘅使用，亦通過呢啲往後後續嘅工作呢，剛才議員所關心嘅呢，係包括咗推行法律嘅推廣啦，向業界解釋相關內容，研究更全面考慮溢價金嘅參數同埋長遠優化溢價金嘅制度。預計係 13 年 10 月底之前呢，係完成最新一次批地溢價金計算參數嘅恆常檢討同埋調整，並將喺政府公報頒布。

草擬土地法嘅法案提及補充性嘅法規呢，將會包括咗設立或終止保留地，特別嘅稅捐，溢價金公開招標，電子化程序。城規法方面呢，統籌協調城市空間嘅資源配置，促進城市可持續發展呢，係要獲得通過，相關部門現在係草擬緊呢城規法提及嘅補充性法規，呢個包括咗規範城市規劃委員會嘅行政法規，規範土地分類及用途嘅行政法規，同時城規法施行嘅細則。文遺法方面呢，係推動澳門文化遺產保護工作，配合咗城規法及相關環保政策。對於都市建築範疇裏面，相關嘅法律法規呢亦進行嘅修訂，包括咗有都市建築法律制度，建築及城市規劃，技術員嘅登記、註冊及專業資格嘅法律制度，同埋呢個防火安全嘅規章。以上啲就係相關嘅配套。

多謝主席。

**主席：**陳美儀議員。

**陳美儀：**多謝主席。

長官：

喺回歸之後呢，澳門嘅公共工程呢都好次出現呢超支嘅問題嘅，例如就係話澳大橫琴校區啦，嗰個河底隧道啦，而家起緊喺北安碼頭、輕軌等等啦，都超支呢超出咗幾倍，甚至乎呢係幾十億嘅，我諗相信呢係全球其他地方呢都係叫做罕有。咁我想問吓長官呢，你點樣去看待呢嘅事呢？日後呢打算係用咩嘅制度去杜絕呢嘅情況嘅發生呢？行政長官呢幾時先至可以落實呢包括高官問責制在內嘅績效治理制度？頭先你就講咗呢，就係話初步呢完成咗設計啦，今年內會推行，你覺唔覺得嘅官員呢嘅行政效率係太慢？咁呢，今日就係立法會會期嘅最後一日，咁社會上呢其實都好多問題仲未可以解決嘅。好多官員呢都有按到長官嘅施政方針呢去做事嘅。例如就係話，我而家呢度都有一封信呢，就係義字五街佢咁嘅心聲。因為呢長官曾經表示過呢就話會去了解佢咁嘅情況，但係呢一直到而家都冇人去到了解，亦都冇任何嘅改善嘅方案。所以呢希望喺呢度呢長官可以責成相關嘅部門呢盡快去解決佢咁嘅困難。

多謝長官。

**行政長官崔世安：**我諗首先關於呢個義字街嘅信呢，你哋交俾我哋，我哋去跟進呢，因為呢個我相信我哋亦收到好多意見，喺個改組方案之後，提出咗唔同嘅意見。我諗其實喺回歸呢 14 年，特區政府運作之後，預算呢，大家都睇到，亦都係提過好多嘅意見呢對於呢個政府，特別係大型工程嘅預算制定同埋到最後呢個實際支出。當然我諗亦都係包括咗好多改動計劃，現存嘅法律法規，關於可以調整嘅範圍等等。但係總嘅來講呢，我哋係完全去支持做好呢一個呢大型工程嘅工程費預算。呢個呢係值得我哋去檢討，亦都係未來呢，我哋係需要呢係經嚴格嘅程序係審慎編製呢個財政嘅預算，特別係關係到呢嘅大型工程。

政府亦都已經啟動呢個預算綱要法嘅修訂程序。財政局亦都係喺今年起，係要求部門喺大型工程立項嘅時候呢，需要提交呢係更詳細嘅說明，項目嘅開支，估算嘅資料呢，係讓呢個立法會去審議。審計署亦都會加大力度監察公共工程嘅預算同埋支出，並係會調整過往事後審計嘅工作方式，提前喺公共工程進行期間呢，分階段進行呢個呢係施行嘅審計。甚至對於個別跨越多年嘅計劃呢施行呢個跟蹤嘅審計。亦都係根據呢我哋嘅檢討呢係作咗呢一啲建議嘅改善，包括咗呢加強對項目預算嘅科學分析，加強呢個基建部門、設計單位與及承建單位呢係技術方面溝通，嚴謹規範公共財政管理嘅措施，加強各部門自身嘅內部控制機制等等。我哋相信呢經過咁多年嘅經驗，同埋亦都呢經過檢討，訂定咗一系列嘅改進方式呢，係希

望喺未來呢，係能夠達到我哋嘅效果嘅。

多謝主席。

**主席：**高開賢議員。

**高開賢：**多謝主席。

行政長官閣下、各位官員、各位同事：

喺早前，國家法改委副主任來澳門作專題講座嘅時候，佢提到喺 2015 年或者 16 年，係將實現內地全面與港澳地區服務貿易自由化，即係港澳嘅企業可以享受內地企業同等嘅待遇，並且希望呢能夠提早一、兩年先喺廣東實現。對於進軍內地市場，特別係建立澳門嘅品牌以及轉型升級等方面呢，相信本澳唔少嘅中小企業呢都係有所寄望嘅。想請問行政長官閣下，特區政府會唔會推出一啲政策措施來協助中小企進軍呢個內地市場發展？又會唔會考慮推出層面多元嘅支援計劃為澳門嘅企業創造有利嘅條件呢？

多謝。

**行政長官崔世安：**多謝高開賢議員。

主席、各位議員：

特區政府係大力支持中小企，希望能夠把握內地嘅發展機會，亦都協助中小企呢係落實走出去呢一個戰略嘅目標。特區政府組織同埋資助本地嘅中小企參與咗各類內地嘅經貿活動。今年嘅上半年，參與內地同埋海外嘅會展呢亦都達 30 多個。全力支持呢主辦呢個活力澳門推廣周嘅活動呢，去推動澳門嘅商品同埋產品，亦都已經呢喺 12 個城市舉行。特區政府每年安排並協助各地嘅省市喺澳門舉辦嘅推介會呢，亦都係希望能夠協助本澳企業更瞭解內地商機，從而發揮發揮呢個平台嘅作用。

協助中小企建設本地嘅品牌，支持企業進行創立自有嘅品牌，大力宣傳澳門製造、澳門品牌、澳門設計，把澳門嘅商匯館、澳門館推到去內地。加強呢個電子嘅推廣，亦都係協助中小企呢開拓市場嘅商機。

喺支持同埋提升競爭力方面呢，亦都係重視咗呢個培訓課

程啦、交流活動啦，加強對中小企嘅中介諮詢服務。實行咗三項中小企財政支持計劃，增強咗呢中小企競爭力。中小企爭取充分利用優惠嘅政策，特別係不斷完善嘅 CEPA 補充協議，能夠爭取更多嘅機會，特別係呢粵澳服務貿易自由化。亦都重點支持中小企把握橫琴開發嘅機遇。

喺呢度呢，借今日嘅機會，我都想講一講，因為近期呢好多都關心到粵澳合作框架協議，廣東裏面特別強調嘅呢兩個粵澳合作嘅地區，就係珠海嘅橫琴同埋廣州嘅南沙。咁喺呢兩個呢其實落實咗呢係希望澳門能夠去參與嘅。咁大家都知道橫琴方面，主要現在有兩個已經比較規範落實嘅工作，一個就完成嘅澳門大學橫琴新校區，呢個 1.09 平方公里，另外一個就係 5 平方公里嘅粵澳合作產業園區。亦都基本規範做咗評審委員會嘅訂立呢，係準備呢根據有規模咁樣呢去招商。

但係出現嘅問題，我相信要幫助澳門嘅中少企呢，特別係經過譚司長同佢嘅團隊呢一定嘅研究呢，好需要呢係政府呢能夠發揮到呢個以大帶小同埋聯合力量呢，先至能夠進軍。因為我相信，特別係商界嘅朋友亦都前一段時間反映咗好多呢入門，呢個門檻好高，亦都真係唔容易。以我哋澳門大部份係中小企業呢，實力呢亦都係唔容易達到呢個門檻呢，繼而呢係進入呢個橫琴呢係發展呢個商業。所以我哋嘅想法就係，一啲大嘅項目呢，我哋同呢啲大嘅項目去磋商，容許我哋喺一部份裏面呢，讓澳門嘅中小企業去參與。

另一個呢就係，結合力量呢來到去做。目前亦都係探討緊，包括咗橫琴發展比較大嘅項目，提供一個機會呢讓澳門嘅中小企能夠有一個發展嘅機會。但係，如果單係澳門嘅中小企呢，相信呢而家呢個門檻真係入門係比較困難。咁呢個我哋會呢係繼續去跟進。同時，南沙亦都一樣啦。因為而家，特別係橫琴，已經有一定項目係批給咗，亦都係進行之中，所以我哋亦都希望呢係粵澳合作裏面呢，係盡量能夠發揮好有利嘅條件。

目前同廣東亦都係極力爭取緊關於若干優惠政策。因為優惠嘅目錄呢出咗喇，但係優惠嘅政策呢，我哋依然呢係等緊。

另外呢關於口岸管理，特別係一線、二線管理，呢個我哋亦都係呢聯同廣東呢積極去爭取緊嘅。所以我相信橫琴亦係一個好機會，喺政府支持下同埋裏面以大帶小，同項目裏面去研究呢，俾機會澳門嘅中小企呢係入橫琴發展呢還是一個好嘅機會。

另外一個方面，我想好多澳門嘅朋友亦都關心到呢，係咪能夠橫琴就業。我相信呢個呢可能要下一步呢，政策定咗呢個目錄之後呢，佢嘅優惠政策能夠延伸呢，我相信先能夠呢發揮到更好嘅機會呢，有更多係能夠有專業嘅人士呢入到去到服務。

多謝主席。

**主席：**梁安琪議員。

**梁安琪：**多謝主席。

行政長官、各位官員、各位同事：

月前，某社團公佈澳門公眾信心指數意見調查，了解佢哋對特區政府、特首及 5 位司長嘅施政評價，以及由居民經濟信心、社會信心構成嘅澳門公眾信心指數進化趨勢，其中發現 1 至 6 月，受訪居民對特區政府嘅評分，有逐步下降嘅趨勢，信心指數亦在六月份跌至最低。另有調查亦顯示，雖然本澳近年經濟持續增長，但居民整體幸福感 3 年來亦持續下降。請問行政長官，特區政府有否重視同進一步分析、檢討為何市民對特區政府嘅評分，會有下降嘅原因？會否結合原因，檢討自身工作不足之處，並推出更適合本澳社會經濟、民生發展嘅施政方針，進一步取得更多市民對施政嘅支持？

此外，政府各部門如何加強同市民嘅溝通，了解不同階層嘅訴求同期望，制訂針對性嘅政策同措施，回應市民訴求，提升市民整體嘅信心同幸福感？

多謝。

**行政長官崔世安：**多謝梁安琪議員。

主席、各位議員：

我諗剛才梁議員提到嘅對呢一個總體評分，喺過去嘅六個月呢有下降嘅顯示。咁從我嘅資料睇到呢，呢個總體嘅評分呢，從一月份嘅 61.5 呢到六月份嘅 58.5 呢，係事實顯示咗呢略為有下降嘅。與此同時呢，居民對政府嘅信任度呢，亦都保持係百分之 70 以上。第三屆政府喺運作以來呢，其實我哋亦都係好重視民意調查、研究等等，亦都係作為施政嘅一個重要嘅參

考資料。喺呢個過程中，我諗要感謝梁議員特別關心我哋出現咗有啲下降，亦都鞭策我哋呢要去面對，點樣做得更好一啲。

我諗完全同意呢，特別係溝通方面，我哋點樣同市民嘅溝通渠道呢能夠更暢順、更有效，呢個我哋會積極去做。但係喺整個施政過程之中，喺呢幾年呢，我哋特別真係要感謝市民俾機會我哋去做。政府亦有好多不足，亦有好多未如人意嘅地方，但亦都喺呢幾年呢，係完成咗呢一系列嘅施政目標。呢個我個人認為呢，我哋亦都係需要呢特別係通過溝通，包括咗重視民意調查，同市民嘅溝通，聽取大家嘅意見呢點樣去改善。就今日參加呢個答問會，亦都聽咗好多意見呢，好值得我返去反思，點樣能夠去做得更好、有進步。

但係，總嘅來講呢，喺呢 3 年，我哋睇剛才議員提出嘅民調，或者相近嘅民調呢，政府大概係百分之六十左右。同時呢對政府嘅信任度呢，亦都保持住一定。所以我哋呢係要好感謝廣大市民呢，係俾機會同埋信任我哋呢，係去施政嘅。喺呢 3 年幾嘅過程中呢，當然亦有好多唔完善、不足嘅地方，我哋一定係會去反思呢、檢討，希望能夠有所進步，亦都希望市民能夠溝通，做得更好。

多謝主席。

**主席：**鄭志強議員。

**鄭志強：**多謝主席。

主席、行政長官閣下、各位官員、各位同事：

下午好。

根據最新嘅統計數字，訪澳嘅旅客正在持續咁增長，但係本澳嘅旅遊配套，例如口岸通關、交通措施等方面仍未盡完善。好似尋日 8 號風球之下，我哋嘅士服務就可見一斑。再過幾年，隨住港珠澳大橋嘅通車，粵澳新道嘅建成，相信到時訪澳嘅旅客將會更加多。請問行政長官閣下，特區政府將如何加強完善旅遊配套設施以應對龐大嘅旅客量？又將如何分流旅客到唔同嘅區份，避免集中喺旅遊嘅旺區，造成長期嘅擠擁，亦藉此可以帶動其他區份嘅營商環境？

多謝。

**行政長官崔世安：**多謝鄭志強議員。

主席、各位議員：

我諗頭先提嘅問題呢，我分兩部份去回答。特別係談到尋日颶風嘅問題，咁我講一講我嘅意見啦。我認為我哋政府應該檢討呢，就係喺我哋口岸管理裏面，特別包括咗大家好關心嘅，同內地嘅口岸啦。尋日亦出現在好多報告問題嘅，關關、飛機場，同埋我哋嘅海運嘅口岸。我諗我哋嘅檢討呢，需要重視無論本地居民同埋來澳門客人嘅安全，呢個係重新去檢視呢，我亦會同相關嘅司長一同去工作呢。

遇到 8 號颶風嘅時候呢，其實個重點唔係啲客點樣去到佢哋嘅目的地，而係啲客呢需要安全。本地嘅人好，來嘅客人好，所以呢係唔應該、亦都唔同意呢去鼓勵佢哋用交通工具嘅。大家好明白 8 號風球嘅意義係乜嘢，亦都係好清晰嘅。當然我哋首先要檢視就係本身特區政府嘅應變呢方面嘅能力同埋設備，但係，係唔鼓勵呢喺 8 號風球裏面，人再繼續咁樣去流動，呢個係產生危險。我哋唔係講點樣運送啲客人，而係點樣保障啲客人嘅安全作為首位。非必要嘅，亦都唔應該、唔適宜喺交通工具裏面去運作。大家亦都好清楚，如果唔係我哋亦都唔會宣佈咁多強制性嘅措施。所以呢個呢我覺得係需要檢視嘅，呢個包括咗機場啦，包括咗碼頭啦，包括咗拱北關。

至於嘅士方面，我哋亦都尋日聽到好多唔同嘅意見，包括咗團體嘅代表，包括咗社會嘅人士。呢個呢係政府嘅立場，我個人認為唔應該鼓勵，亦都唔應該支持呢咁危險。因為嘅士司機本身都好危險，我哋要關心佢嘛，我哋唔係因為佢去搵到特別多嘅外快，我哋係關心佢嘅安全，同廣大市民一樣。8 號風球嘅時候，我諗最重要係關心居民嘅安全。

對於旅客來講，我哋檢視之後呢，我哋增強呢個能力呢，係點樣喺短時間令佢喺安全嘅地方逗留，等呢個颶風過咗之後。因為誰都唔想有颶風，亦都係大家都好關心，會將自己嘅日程係改變咗。呢個我相信呢特區政府係應該檢討嘅。譬如而家重新裝修呢個客運碼頭啦，就會有更多嘅地方啦，遇到有呢啲需要嘅時候呢，俾客人停留。亦都係希望我哋能夠做到呢提供佢基本上暫時停留嘅生活必需品，使到呢啲客人能夠安全咁停留，風球落咗之後呢，去繼續佢嘅旅程，繼續佢嘅行程。咁呢個我覺得係需要呢整個社會大家都去關心。其實我哋就係關心我哋市民嘅安全，關心我哋客人嘅安全。

剛才提到我哋嘅能力方面，特別喺旅遊呢，我認關係到兩樣，一個本身我哋嘅承載能力，澳門我哋特別行政區嘅承載能力。呢個工作呢長期呢係委任咗呢個旅遊學院呢，每年都有做。最近嘅數據我睇呢，大概每日承載嘅能力呢，係 8 萬 1 客左右。咁同時亦都係睇得到喺過去一段時間，由於遊客嘅不斷增強，喺好多旅遊嘅集中點呢，係出現咗擠逼嘅現象，亦都係出現咗好多交通嘅情況。咁我同張司長、旅遊嘅部門呢，亦都係充份溝通過呢，其實有幾個要素呢，我哋係要關心嘅。第一，其實客人我哋就有得揀嘅，亦都唔可以指令佢去邊度去邊度，但係我哋盡量呢希望係能夠做到呢係一啲分流，同埋用一啲宣傳推廣去一啲非我哋時常去嘅旺區，來到呢係將呢個旺區嘅擠逼呢減低，進而帶動一啲經濟嘅效益去到一啲譬如冇咁旺嘅，但係具有文化價值、旅遊資源同埋豐富嘅歷史資源嘅，非旺區嘅旅遊嘅定義裏面，但係其實我哋覺得係好有旅遊資源可以發掘嘅，呢啲舊區。咁同時亦都希望咁呢來帶動佢哋一啲商機。

但係呢我同旅遊部門作呢個溝通研究嘅時候，亦有一方面嘅意見，就係有一啲舊區仍然唔希望太多客去，佢話去到之後呢會影響佢哋正常嘅運作，同時呢租金亦都會飆升。咁可能係有真係唔同嘅意見，但係總嘅來講呢，都係認為應該盡量我哋係透過做呢一個分流、宣傳、推廣，將一啲具有旅遊資源、文化價值，亦都係舊嘅區或者一啲點呢，係將呢個旺區呢能夠分流同埋將個擠逼情況能夠係減低一啲。呢個係好需要一個過程，我相信旅遊部門亦好落意加大力度去推廣呢個其他嘅、有旅遊資源嘅區域，來到去俾啲客人多一啲選擇。

咁我知道旅遊部門亦都係做緊多條路線，以大三巴為起點去分流啲客人去到唔同嘅地方，包括咗去到咗我哋熟悉嘅北區啦、媽閣啦等等。同埋特別亦都有過往同旅遊局、文化局合作推廣嘅文化遺產嘅旅遊路線。咁希望能夠呢帶將啲旺區分流同埋個擠逼情況減少。

但係我相信最大嘅問題，我哋亦都要關心呢，就係我哋嘅口岸管理能力，目前呢個其實係一個大嘅問題。所以特區政府呢係全力同廣東向中央係希望能夠早日審批到我哋粵澳新通道，加強呢個口岸能力，因為目前睇來呢係我哋其中一個大嘅問題，因為我哋三大客源市場呢係內地、香港、台灣，所以呢個客人嘅擠逼程度亦係我哋目前遇到嘅一個好大嘅問題。希望能夠早日審批，可以去解決一個比較長遠嘅計劃。

多謝主席。

主席：徐偉坤議員。

徐偉坤：多謝主席。

行政長官閣下、各位官員、各位同事：

澳門嘅經濟定位係構建於世界旅遊休閒中心，同埋一個中葡經貿合作平台，做好與鄰近區域合作，不但可以優化本地嘅條件，而且係構建一個中心、一個平台所涉及嘅多個產業發展嘅工作係息息相關嘅。近年澳門積極落實與珠海共同開發橫琴，各項工作呢係穩步推進，係有目共睹嘅。但係除橫琴嘅項目之外呢，廣州嘅南沙亦都係《粵澳合作框架協議》中另一個重點合作平台。喺今年嘅粵澳合作聯席會議，雙方亦協議咗將共同開發南沙作為未來一年嘅重要工作項目。

深化區域合作將會為澳門嘅企業帶來各種商機，有利於實現產業式嘅適度多元。請問行政長官閣下，澳門喺南沙嘅具體發展藍圖係點樣？現階段與廣東省合作嘅進展同埋未來計劃又係點樣？

多謝。

行政長官崔世安：多謝徐偉坤議員。

主席、各位議員：

澳門特別行政區與南沙嘅合作其實係積極有序推進嘅。同珠海嘅橫琴一樣，廣州嘅南沙呢係我哋兩個國家級新區嘅合作。亦都簽定咗共同推進南沙實施 CEPA 先行先試綜合示範區嘅協議，確定咗未來合作嘅重點。第一係明確加強喺旅遊商貿會展、文化創意、中醫藥同埋教育培訓嘅產業合作，第二係探索共建綠色優質生活圈嘅示範區。澳門同廣州嘅合作喺幾個重點領域呢亦都係取得咗良好嘅進展，包括咗去年 12 月簽署咗會展、農產品供應、文化產業合作協議同埋意向書。亦都喺 5 月舉行咗推介會，簽署咗一系列嘅合作協議。喺 6 月嘅粵澳合作聯席會議上，係簽署咗關於遊艇自由行政合作意向書，推動休閒旅遊合作，簽署職業教育合作框架協議書，推進旅遊職業教育嘅合作。

喺支持相關合作機制嘅建設呢，係由法改委牽頭呢，廣州南沙新區建設部門聯席會議嘅制度，共同去研究南沙新區開發建設中嘅問題，把各界建設性建議呢係帶入新區嘅建設中。喺

展望未來呢，我哋係希望能夠加強兩地嘅旅遊、商貿、會展、文化創意、教育培訓、鮮活農產品等產業嘅合作，亦都優化兩地社會管理、社會服務、醫療保健、環境保護等嘅合作。

喺呢個過程之中，南山亦有佢有利嘅條件，因為佢嘅土地面積比較大，同時亦都提供好多先行先試作為呢個綜合示範區嘅優惠，希望能夠去加強。特別我哋好積極參與嘅遊艇自由行，同埋佢作為遊輪母港係點樣將啲客人呢將來能夠來澳門，呢個呢有利於旅遊。

另一方面呢，亦都好希望我哋嘅旅遊方面呢，高等教育範疇好、職業教育範疇好，能夠喺南沙呢做更大的合作。

另一個方面呢，就係文化創意產業，咁呢幾個我哋都係積極推動緊嘅。而且係好明確，因為係幾個大嘅框架協議裏面，同埋個國家一二·五規劃港澳篇裏面嘅澳門裏面嘅細節呢亦都係明確咗呢澳門投入喺呢個珠海嘅橫琴同埋廣州嘅南沙嘅。咁最近，亦都同大家報告，廣東省好積極希望澳門參與呢一個中山翠亨新區嘅建設嘅合作，亦係呢希望係向聯同大家嘅合作向中央申請呢個新區嘅建設嘅。咁而家我哋依然係一個去交流資料、了解情況嘅階段。但係今年舉行嘅粵澳聯席會議裏面呢，粵方已經正式提出咗呢個係繼廣州嘅南沙同埋珠海嘅橫琴之後呢另一個嘅。咁呢個對我哋來講呢係新嘅意向提出，目前我哋仲係喺呢個資料交流嘅階段去了解。

多謝主席。

**主席：**蕭志偉議員。

**蕭志偉：**多謝主席。

行政長官閣下、各位官員、各位同事：

咁對本澳人口老齡化嘅問題，社會係要求政府需要加大資源去投入去完善長者嘅服務。而長者過往係為咗社會同埋家庭作出貢獻，社會同埋家庭應該對其晚年嘅生活係理應給予更多嘅關愛。特區政府致力去完善各項嘅安老政策，鼓勵同倡導原居安老。家庭養老係符合咗中國人嘅傳統倫理生活方式，既滿足長者物質同埋精神嘅需求，亦都能夠體現中華民族嘅孝道。而大部份嘅長者都希望同子孫共享天倫之樂，而年青嘅一代亦都希望能夠照顧佢哋嘅年邁嘅父母。由於本地人力資源匱乏，年青雙職家庭係極為普遍，佢哋對於家中長者係根本無暇

照顧，亦都感到力不從心，居住嘅環境空間狹窄等等嘅因素，而影響咗使到年青人係無法同長者共同生活。

另外，相關嘅資源服務亦都唔足夠，譬如專業嘅護理人員嘅供求失衡，社區嘅護理服務都未能夠滿足長者一啲健康護理嘅實際需要。所以本澳因為現實環境嘅轉變，係俾原居安老呢種傳統嘅生活方式呢係帶來咗一啲新挑戰。

請問行政長官，對於長者原居安老所遇到嘅一啲現實問題，政府未來點樣去優化長者嘅政策同埋措施，使到長者能夠獲得適合咁支援同埋幫助，讓長者能夠老有所依、老有所養、老有所為？

多謝。

**行政長官崔世安：**多謝蕭志偉議員。

主席、各位議員：

我諗長者安老政策係以家庭照顧、原居安老、社區嘅支援呢，大家亦都比較明白，呢個亦係中華文化裏面，家庭與養老呢係密不可分。剛才蕭志偉議員呢係提出咗好多澳門現實嘅問題，特別係一代一代人呢個文化可能有啲改變嘅問題。咁我諗其實大家睇返一個實際嘅數據呢，從呢個聯合國嘅衛生組織呢，一個地區如果 65 歲以上嘅人呢係超過咗 7%，係進入一個老齡化嘅社會。目前我哋掌握最近嘅統計呢，澳門大概係百分之 7.7% 左右。未來呢由於人嘅壽命延長，咁我哋相信呢我哋係逐步呢係呢個老齡化社會裏面，係會增加好多我哋嘅長者，咁所需要嘅服務呢亦都係比過去更多嘅。所以政府已經成立咗跨部門嘅小組全面評估養老嘅保障，包括咗醫療、住屋，退休保障、社區支援等等，亦都係制訂呢個 2016 年至 2025 年長者服務嘅 10 年行動計劃，完善維護長者嘅權益。

喺養老體系裏面呢，亦係多重支柱、多個層面嘅綜合模式，包括咗醫療、居住，雙層社會保障，應急救助、社會福利、持續進修，社區老人服務、家庭支援等等。亦都特別重視咗多元化對老人嘅院社服務呢，係未來嘅發展方向。

喺過去一段時間，大家都好關心現在長者排緊隊要進入院社嘅。最近我哋掌握資料呢，呢個菩提禪院係落成之後可以提供 300 位左右。咁另外呢，安老院喺呢個 2016 年，喺呢個公屋群裏面呢，亦都會增加大概 1000 位。根據呢個社工局嘅研

究，係基本希望能夠滿足到，當然未來我哋睇到隨著壽命嘅延長，長者嘅更多呢，係需要建立更多嘅設施來到去照顧。但係好同意剛才蕭志偉委員所講呢，其實作為家庭照顧、原居安老呢，係一個好好嘅理念，但係呢個理念我相信呢，真係要大家齊心有共同嘅理念先至可以，因為現來講，唔係單係澳門，好多唔同國家地區呢，唔同嘅老人家住嘅院社呢係一路增加嘅。咁我哋呢方面亦睇到有呢個需求，咁但係我哋好想像政策方面係能夠多設一啲社區嘅支援，例如日間嘅中心，例如去到家居嘅服務，都使到呢個老人家能夠係家居裏面安老。因為有親人嘅照顧，喺熟悉嘅環境呢對老人家始終係一個非常好嘅條件嚟嘅。

多謝主席。

**主席：**好，各位議員：

現在已經係 4 點 15 分喇，咁我哋休息 30 分鐘之後，4 點 45 分繼續會議。

(休會)

**主席：**好，我哋繼續會議。

請何潤生議員發言。

**何潤生：**多謝主席。

行政長官閣下、各位官員、各位同事：

早前係政府嘅協調下面，有線係終於同公天簽署咗協議，並且係由政府支付千萬公帑呢，來保障居民有電視睇，但係電視嘅頻度呢卻大幅咁削減三分之二，連公帑營運嘅澳視高清同埋體育兩條頻道呢亦都無法接收，令到居民接收資訊嘅權利呢，大大咁樣嘅受損。此外當局更加發表呢居民可以自行安裝魚骨天線去接收電視頻道訊號。呢啲極唔負責任嘅言論，激發起民怨，擾攘一輪之後呢，當局又改口呢係宣佈可以重新咁接回兩個頻道。

從事件可以睇到呢，當局根本係一直處於見步行步，被動嘅狀態，甚至可以稱得上係胡亂作為，先至能夠導致上演一齣呢濠江電影風雲嘅鬧劇。需知道 40 幾年來，澳門居民呢已經習慣採用公天呢去接收免費嘅電視，喺社會發展過程裏面形成嘅

生活習慣同埋形態，呢一個可以講話係澳門嘅與別不同，但係亦都係歸咎於呢政府嘅長期放任不管所致。因此現在呢個困局並非澳門居民自行製造嘅，卻要我哋共同嘅受災，齊齊咁樣埋單，究竟個道理係喺邊度呢？為此呢想請問行政長官閣下，會否係確保居民未來收睇電視頻道，一個都不能少？對於政府強調嘅喺明年四月有線專營合約屆滿之後呢，會採用一個開放嘅模式去發展電視服務嘅市場，請問現時呢有冇一啲具體嘅規劃同埋方案，倘若屆時未能夠及時開放市場，當局又是否再以保障居民獲得資訊權嘅防護罩，來延續協議，繼續讓一次嘅合同，牽著鼻哥走呢？

多謝。

**行政長官崔世安：**多謝何潤生議員嘅問題。

主席閣下、各位議員：

我諗近期大家都好關心關於有線與公天呢個權益糾紛嘅問題，到呢個中級法院作出咗裁決。亦都係大家關心到呢特別係過去幾十年，我哋澳門廣大居民，我相信好大部份都係同公天一齊成長。呢個係早幾日傳媒嘅朋友訪問我嘅時候，我都講到其實我自己屋企都係咁樣。呢個係一個客觀事實嘅歷史過程，但係作為特別行政區政府呢，我哋幾個原則必須要遵守嘅，遵守法律。我哋一定要依據中級法院所作出嘅裁決去執行。大家如果有留意到呢個裁決，亦都好明確釐定咗呢個合法性嘅原則，同時亦都係好明確有日期，90 天呢係需要呢去執行。我覺得特區無論點樣做，喺呢個過程之中，特別喺個歷史過程之中，大家都知道公天存在咗咁長嘅時間，而喺如果我無記錯，喺回歸之前呢，係有呢個有線電視嘅成立，亦都簽訂咗呢個合同。所以呢次裁決裏面，既要遵守法律，既要執行中級法院嘅裁決，亦要尊重呢個合同嘅細則。好明顯大家睇到澳門作為一個法治之區，作為簽訂嘅合同，特區政府亦都應該去尊重同埋遵守，如果唔係嘅話，咁多嘅特許好、專營好，合同嘅制約嘅條款，我哋又點樣去看待呢？

我諗喺呢個過程之中，當然大家有好多批評政府，喺處理一個歷史遺留嘅問題裏面，係咪長期未有妥善。亦都係關係到有線電視股份有限公司同呢個公天公司之間嘅權益糾紛。但係經過咁多年，最後中級法院作出呢個裁決，亦都係相信去解決呢個事嘅時間，因為佢有一個 90 天嘅限期。

咁劉仕堯司長喺跨部門裏面組成咗呢個工作小組，亦係好努力咁樣工作，包括咗我哋電訊管理局，包括咗我哋法務嘅部門等等呢，去解決根據執行中級法院嘅裁決。一方面希望執行呢個裁決，另一方面亦希望去保護到廣大市民呢能夠繼續收看，我哋簡單講，繼續有電視睇。喺呢個過程之中，點都唔能夠去偏離咗個原則呢，就係守法同埋執行呢個裁決。所以佢哋經過研究，反復研究，得出呢一個係一個可行嘅辦法。亦都係報告咗呢次同公天嘅簽訂係啲新嘅設備同埋運作費用嘅需要。我亦都同劉司長商量，我相信可以開誠布公，公布俾大家睇呢啲費用嘅細則係點樣來，來到消除大家諗呢啲費用係用喺邊度呢？

但係，千祈，我諗要有一個好明確嘅原則，就係我哋係有一個限期，90 天我哋一定要執行。大家亦都可以細心睇吓個裁決，呢個如果唔執行嘅話，我哋政府係會違令，包括咗電訊管理局，亦包括咗管理呢個範疇嘅政府嘅代表。大家睇得好清楚嘅呢個，我哋所以必須喺呢個限期內去解決。

另一個問題就係，現在談到話睇少咗台。其實大家睇咗幾十年，已經成咗一個習慣，亦係我哋成長嘅電視文化，喺我哋生活裏面嘅一個重要部份。睇少咗希望睇返原本嘅，呢個係可以理解，但係絕對係喺個守法原則下，政府去盡量爭取能夠有幾多個頻道可以收睇得到。喺呢幾天呢，劉司長同佢嘅小組成員亦係一路努力去爭取緊。呢個大家亦都睇到報道，包括咗同呢個有線電視，包括咗呢個澳廣視等等。習慣睇開，冇得睇，梗係想睇啦，幾十年大家都習慣晒嘅嘢，一下子去改變，但係特區政府亦都只能喺最大嘅努力下呢，去能夠將呢啲，我哋簡單講，合法嘅頻道呢去來到播。咁嘅情況下，我哋亦都要去工作，去釐定。我哋亦都唔想因為執行一個裁決，又引伸一個版權嘅問題。我諗大家亦都好明白到喺呢個裁決裏面，對經營咗幾十年嘅公天所提出嘅，裁決裏面亦都寫得好清楚，乜嘢係合法轉播，乜嘢係非法轉播。

所以我諗，我又好關心廣大市民睇電視，但係作為特區政府亦都先只能喺執行裁決同埋合法嘅原則裏面盡量去做。亦都同劉司長商量咗，開誠布公將所有嘅費用呢詳細咁公佈俾大家知道呢啲費用係點樣用。因為我嘅理解其實係接納咗多一個來到去做，所以佢有佢嘅設備去運作。亦都要尊重同埋尊重法院嘅裁決去執行，就係有線電視佢呢個合同，係容許佢作為呢個有線電視嘅經營者。所以喺呢啲平衡裏面，我諗做出咗呢個決定呢，只能夠係睇晒以前嘅頻道，但係盡量去睇咗日常習慣嘅頻道，而去爭取更多嘅頻道。但係，何潤生議員，喺我今日

呢個位置，我真係答你唔到你一個台都唔可以少，呢個真係無辦法去答應。我可以答應你同劉司長同啲同事，盡量去喺合法嘅原則下，爭取更多嘅頻道，讓我哋廣大市民呢繼續收看呢個電視。因為其實幾個概念裏面，好多嘅複雜問題今次透過裁決亦都係釐清咗，有線廣播呢個問題。所以我諗幾十年已經運作咗嘅嘢，一下改變，市民有佢嘅意見，亦都好理解，但係呢希望再俾一啲時間政府，喺合法嘅原則下，盡量能夠有更多嘅頻道。咁呢幾天劉司長嘅小組亦都好努力，大家亦都睇得到，從呢個傳媒嘅報道裏面呢，係努力緊嘅，但係執行裁決同埋守法呢，呢個必定呢特區政府會堅定不移。

多謝主席。

**主席：**黃顯輝議員。

**黃顯輝：**多謝主席。

行政長官閣下：

在醫療設施建設方面，特區政府已經制訂完善醫療系統建設方案，以 2020 年作為目標，按短、中、長期計劃，增建仁伯爵綜合醫院急診大樓同專科大樓，在擴建 11 間衛生中心及兩間衛生站，主體目標係興建離島醫療綜合體。而在離島醫療綜合體建成之前，已經增設離島急診站及社區綜合病區。綜觀上述方案，特區政府除要投入 8 億元資金之外，尚需要配備和增添一定數量的專業醫療人員，以確保日後有關醫療系統建設落成之後，為特區市民提供所需公立醫療服務。請問行政長官閣下，在未來所需醫療人員的培訓、招聘、晉升方面，特區政府對相關工作有甚麼安排呢？

**行政長官崔世安：**多謝黃顯輝議員。

主席、各位議員：

我諗大家都好關心未來十年呢個醫療系統嘅建設方案。喺前一段時間有關部門亦都係公佈咗一個一個嘅階段。現在黃議員好關心就係人力資源嘅問題。

因為從實際嘅數據去睇呢，喺 2012 年，目前，我哋係有 421 個醫生，呢個係講政府嘅，有 925 個護士，674 張病床。咁喺去到 2020 呢，係會增加 400 個醫生、1000 個護士、1026 張病床。從呢個硬件嘅建設，特別係醫院同埋衛生中心呢，睇到將

來需要嘅人手係接近呢高於百分之一百嘅。咁所以我睇到佢哋已經訂定咗短、中、長期計劃，包括兩所護校擴大嘅招生啦，仁伯爵醫院、鏡湖醫院、科大醫院呢 3 間醫院嘅合力培訓嘅醫生。喺中、長期來講呢，離島醫療綜合體亦都預留咗培訓中心同埋建設護理學院嘅用地。喺專業培訓方面呢，正係研究修訂實習醫生培訓制度。考慮到統一規定專科醫生培訓嘅實習期係 6 年，邀請外國嘅專家來到考評。與香港嘅醫管局呢定期培訓本澳嘅醫生，每年有醫護人員出外受訓。邀請專家來澳指導講學。亦都完善醫療嘅專科，包括大家好關心嘅老人科、腫瘤科、心臟科、精神科、慢性病科等。

我諗特別談一談今日幾位都好關心嘅老人家。其實睇到喺未來嘅醫療計劃裏面呢，喺專科醫療呢確立呢個老人科。亦都培訓老人科專科醫生。相信喺呢一系列咁龐大嘅計劃裏面，特別係軟硬件呢，係希望能夠確保到呢個醫療服務。特別我想今日講吓呢，喺公立醫療裏面呢，我諗而家幾個問題其實大家好關心，一個就係長時間嘅輪候啦，一個就係我哋專科醫生嘅水平。咁係希望能夠透過政府喺政策資源嘅支持同埋投入有關嘅衛生部門，喺未來嘅日子裏面喺建立咗硬件，亦培訓到專業人才，係能夠縮短呢個專科輪候嘅時間，亦提高到我哋本地區嘅醫療質量。更重要亦都係醫療能夠到位嘅。咁呢個係從政府政策係肯定去支持嘅。咁我相信喺張司長領導下嘅衛生部門，未來亦有大量嘅工作，係喺呢個十年嘅完善醫療系統建設方案裏面呢，係點樣落實嘅。

多謝。

**主席：**唐曉晴議員。

**唐曉晴：**多謝主席。

行政長官閣下：

陽光政府、科學施政呢，係我哋特別行政區政府極力提倡嘅施政理念。咁喺支撐科學施政呢方面，有完整同埋準確嘅數據係好重要嘅。政府根據統計數據分析嘅結果，可以制訂一啲符合科學嘅政策。咁政策成效呢亦都可以喺之後呢個統計嘅度反饋返來。咁可見統計數據喺政策嘅制訂、執行同埋改善呢，各個階段都擔當住重要嘅角色。

回歸之後，特區政府喺完善統計工作方面呢，取得咗一定嘅成就，但係同鄰近嘅發達地區同國家相比呢，我哋嘅相關工

作呢仍然係有改善嘅空間嘅。有一啲範疇例如不動產交易統計裏面，我哋可能可以做得更細，例如建築面積、地區分佈，交易嘅數目同埋價格嘅分類等等呢，都可以有一啲更精確嘅變化嘅。如果我哋有高質素同埋切合需要嘅呢個統計數據呢，政策研究制訂同埋成效追蹤呢都會面臨困難。所以呢，我想請問行政長官閣下，政府可否多投資，投放資源，進一步完善我哋澳門各方面嘅統計資料，以為呢個特別行政區政府科學施政提供呢個更堅實嘅基礎？

多謝。

**行政長官崔世安：**多謝唐曉晴議員。

主席、各位議員：

官方統計呢係政策制定同謀劃未來規劃嘅基礎資料。而功能方面呢，係公眾了解社會發展狀況嘅事實，協助社會進行研究、討論、規劃，社會決策參考。增進與外地相互了解同埋交往。而官方嘅統計原則呢，就係統一化、專業化同埋國際化，亦都係適應本地嘅發展與國際接軌嘅官方統計體系。

喺未來嘅工作方向呢，係建立呢個旅遊嘅方面嘅附屬賬戶，評估旅遊服務嘅經濟貢獻。亦都係完善新興行業嘅統計，包括擴大會展業統計嘅涵蓋範圍。開展居民參加文化活動調查等。第三係做好各行業嘅人資調查，以延伸人資調查嘅範圍至托兒及安老機構，喺本年 5 月會公布第一季結果。

我哋好明白到好多嘅行業同埋亦都提出咗好多嘅要求，喺呢一個檢討同埋改善。亦都係希望政府投入更多係喺呢個統計方面，以配合規劃同埋發展。咁我相信政府係好願意嘅。但係統計部門亦都有一個擔心，就係如果我哋時常要向呢啲廣大嘅居民進行調查、問卷，好多嘅時候呢，又會有一個反應率，出現一個問題，所以呢個我諗政府願意做，但係有時又要體諒呢啲市民。

而家其實除咗官方，民間都好多電話嘅。我試過，好似係前晚，打風前一晚呢，我都接咗四個調查，但係我都好耐心咁慢慢同佢講，但係一般人呢，如果放完工返去，啱啱食飯嘅時，又鍾意睇開啲套電視劇，你幾個調查嚟呢，可能都有啲悶。第一個呢可能比較好願意去答，但係而家我諗真係研究、調查係多咗好多。當然呢個係非常有利於政策制訂、規劃未來、出謀獻策，但係真係多咗好多。

但係我好同意唐議員所講呢，好多嘅專業範圍，提出意見呢我哋係應該呢去細心研究嘅。譬如剛才你講出樓宇建築方面，呢啲專業嘅。因為近期我睇到，譬如喺旅遊嘅統計啦，因為佢要同國際接軌同埋好多嘅計算方式係要符合，會展業啦呢啲都係。所以我覺得專業方面係……但係呢睇吓啲市民可唔可以特別關心官方統計調查資料嗰陣時呢，鼓勵配合，咁我諗就會攞到多好多實際嘅數據。因為如果冇一個市民嘅廣泛支持呢，可能你出現數據搜集嘅時候，有不完整等等嘅現象。咁呢個呢係好同意嘅，特別係投放資源呢係專業方面，係來到使到我哋真係達到統一化嘅標準，專業化嘅標準，同埋國際化嘅標準，因為澳門亦都邁向一個國際嘅城市。

多謝主席。

**主席：**李從正議員。

**李從正：**多謝主席。

行政長官閣下：

勞動範疇有好多問題，長期都無法解決。又或者存在監管不足，尤其以黑工、管理外僱嘅輸入同埋退場等嘅問題呢最為突顯。更甚嘅係有關完善打工仔合理權益嘅法制工作啦，至今毫無寸進；最低工資立法緩慢；公積金構成一拖再拖；工商意外法律嘅修定都無影無蹤；欠薪嘅基金制度過於簡單；唔合理嘅解僱補償上限，亦都唔合時宜；層層分判嘅規管制度呢，只聞樓梯響等等。社會嘅訴求強烈，可惜當局呢再任由勞資雙方呢，各自拗手瓜嘅方式來到協調呢啲如此重大嘅社會問題。為此，想請問行政長官閣下，政府就完善重大嘅社會問題嘅協調諮詢機制上面又有啲咩嘅構想？而對於一系列社會嘅重大問題，尤其係有關於勞動事務嘅制度、法律法規嘅構建同埋修訂工作，具體係幾時完成？

唔該。

**行政長官崔世安：**多謝李從正議員。

主席、各位議員：

喺維護勞工合法權益上，一定係貫徹以人為本嘅施政理念，希望能夠積極有序呢咁去推進工作。但係喺個工作方面，我相信亦有不足，但係本身呢個事亦係有佢嘅複雜性。社

會協調常設委員會係政府、僱主、僱員溝通嘅重要平台，亦都希望呢能夠繼續發揮得好。溝通機制一直得到好嘅實施，係符合咗基本法嘅要求，亦係國際勞工組織公約建議嘅運作模式。

喺加大力度打擊黑工，維護勞工權益，完善法律法規、監管機制，目前呢有序進行嘅立法工作，包括咗呢要檢討勞動關係法，聘用外地僱員法。同時最低工資嘅立法呢，跟進法案嘅草擬呢，將會喺今年嘅 9 月份公開諮詢，爭取年底完成立法前嘅準備工作。

喺工傷保障方面呢，喺正修定緊工作以外及職業病嘅法律制度。主要修改嘅構想呢喺將工作以外保險嘅保障範圍，適度擴展至僱員往返居所與工作地點路途間所發生嘅意外，並優化喺工作以外受害人支付醫療費用嘅程序。第三，已經諮詢咗保險工會嘅意見，並跟進分析個後續工作。

破產欠薪嘅墊支制度，包括咗因為勞動關係而產生嘅債權保障。呢個法律草案呢我哋係希望今年內呢，年底前係提交立法會。亦都係關係到呢個勞動債權保障機金行政法規呢，係上述所講嘅法律通過後呢，亦都係生效。

解僱賠償方面呢，今年嘅四月，已向勞資代表引介咗調整勞動關係法，不合理的僱賠償上限嘅法案。雙方亦就法案提出咗意見，而家正係喺度分析，希望年底前完成。

關於工作場所分判登記制度嘅立法進度呢，係關於加強力度去杜絕非法工作嘅跨部門工作小組。經過多次嘅會議之後呢，喺取得咗呢個立法嘅共識，係草擬法規，並細化條文。已經係特別同譚伯源司長係討論咗加快去關於呢個勞動關係法嘅修改，亦都政府會喺呢方面努力。

我今日借呢個機會呢，特別因為同勞工界好同商界好呢，都多次接觸。就舉勞動關係法呢個例呢，其實大家都想運作一段時間去修改。目前呢聽咗好多意見，主要有兩個問題，係對政府提出要求嘅。第一就係希望喺共識呢係當然最好啦，但係未有共識嘅時候呢，係政府希望能夠一個促成呢個共識，一個係作出呢個訂定，呢個有利於推進。第二個就係時間表嘅問題，好多時喺當時去傾係好有用嘅，但經過一段時間之後，可能有變化，咁係咪喺個時間表度掌握同埋係定期檢討呢個問題？咁我哋會好關心呢樣，亦都責成譚司長喺呢個幾方面我哋從速去進行有關嘅工作。我哋承認係有不足，但係亦都有好複雜嘅一面嘅，但係政府係願意去做。

多謝主席。

**主席：**吳國昌議員。

**吳國昌：**行政長官閣下：

以現在政府現行處理提前取養老金嘅公式去計算，每一次合理調升養老金金額嘅時候呢，選擇提前領取嘅老人家都受到損失嘅。咁面對住官僚，啲老人家都分別用唔同嘅算式計算出相關嘅損失嘅具體結果。但係問題到而家仲未解決，仲未解決。班老人家仲希望研究呢確保養老金能夠與最低維生指數掛鈎。但係無論如何，老人家吩咐我而家唔係抗爭，係請求特首親自去關注。所以呢啲將來可能成為我哋珍貴嘅文化資產嘅一啲資料呢，係等散場握手嘅時候，我先至交俾特首。

我今日要講嘅問題係公眾期望長官能夠落實主要官員嘅高官問責問題。要將主要官員推陳出新，亦都令到主要官員能夠去留有度。咁但係個問題就係，公眾批評呢行政長官頒布嘅主要官員通則守則呢，統統形同虛設，完全無能夠執行到高官問責嘅。咁因此呢，今日喺呢度呢就唯有係遞呢個呢係俾特首。咁希望特首能夠呢，係做到，尤其是面對將來下一屆小圈子爭取連任特首嘅時候，真係能夠做到推陳出新，去留有度，幫我哋澳門落實到真係好嘅高官問責，以免令到啲“墓地門”大失公信，萬九公屋脫晒期，跟住而家呢就電視風雲爆亂局，水患又惡化，公共工程大幅超支。繼續落去好唔掂啊特首，所以好希望善意提醒，推陳出新，去留有度。

多謝。

**主席：**特首可以選擇其中嘅問題嚟回答。

**行政長官崔世安：**好。

多謝吳國昌議員嘅問題。

**主席：**

我係今日呢會選擇答呢個提前領取養老金呢個問題嘅。我諗呢個我需要首先解釋一下政府個政策嘅制訂。大家都知道社會保障建立初期呢，係以 65 歲去領取社保嘅養老金，呢個當時呢係政策制訂作為一項必要嘅條件嘅。咁喺 2008 年，政府接納咗一啲社會提出嘅意見，經過討論呢，係照顧咗部份因為生活

有困難嘅一群呢，喺 65 歲之前，60 至到 64 歲呢，係來到發出呢一個提前領取養老金嘅。喺一個非強制嘅形式之下，設立咗呢一個容許提前領取養老金嘅比例發放。60 歲係會收到百分之 75，61 歲係收到百分之 78.9，62 歲係收到百分之 83.3，63 歲係收到百分之 88.2，而 64 歲係收到百分之 93.8。咁呢個收取呢係一路到佢哋 80 歲嘅，因為我哋現在呢平均嘅壽命係亦都高於 80 歲。

喺呢個 60 歲去到 80 歲嘅時候，佢係一路收取百分之 75，而 65 歲去到 80 歲呢，係收取 100%，如果係 65 歲先開始領取，呢個係當時呢初定政策之後，喺 08 年呢進行咗呢個，加入咗提前領取養老金嘅。咁大家都知道社會保障基金呢，係以社會保險性質進行運作，我哋係發揮社會保險嘅基本功能呢，係跨代共濟。提前領取養老金呢，其實係保險制度嘅一個方式，係包括咗人嘅年齡預期，對健康狀況嘅預期，亦包括咗呢提前領取所得嘅金錢時間價值。換句話講，當時設計係 65 歲能夠去收取。

喺澳門來講，好多制度上大家都明白 65 歲雖然有一個法律明文規定，但係我哋都已經習慣咗 65 歲。譬如舉個例退休、醫療等等。喺呢個情況之下，現在我諗吳議員所提出嘅呢，同埋我哋啲長者朋友交俾佢嘅呢，係關係到個升幅調升，然後再計到由 60 歲，或者至 61、62、63、64 歲呢，擺到 80 歲。每一個佢未到 80 歲嘅時候，佢提取百分之七十五裏面嘅差額嘅問題。

咁我哋亦都關注到現在呢個實施之後，係高過百分之五十，係收取呢個提前嘅。咁當然有佢哋嘅理由啦。喺當時我哋推出嘅時候，覺得要幫助經濟上有問題嘅，咁呢個係有佢哋理由嘅。咁我哋睇過個約數呢，提前嘅係大概呢係有 34000 人喺目前。而總嘅呢我哋睇到已經係超過咗百分之五十。咁我覺得呢個呢其實首先要解釋清楚當時個政策制訂呢係 65 歲嘅，係基於呢一個支持經濟困難嘅原因呢，向前推咗呢係收，而收呢係百分之七十五，至到八十歲，而八十歲以後呢，係收返百分之一百嘅。我希望我有理解錯咗。因為其實社會保障呢啲，每一個項目嘅計算方式、釐定，都係比較係需要技術分析、精算等等。

咁我諗現在如果提出呢個問題嘅時候呢，今日吳議員提出呢係想請求政府點樣去諗呢個問題，我諗係。因為制度好明確嘅，呢個亦都係通過。咁我諗我哋係咪首先就係咁呢個提前發放養老金百份比呢，呢個表呢，我哋進行研究，亦都搵精算師

呢去分析。到底提前咗，如果改呢個比例，我哋嘅負擔同埋得嘅後果，得到呢個研究向大家公布，再分析一下。因為跨代共濟，其實大家都明，而家受益嘅就係唔係自己供嘅，好簡單講，好多時。但係而家提前領取呢真係可能一個新嘅概念，如果要改呢個百分比。因為喺好多，我哋亦都睇過唔同嘅國家地區呢，提前攞嘅呢唔強制，但係亦都係有比例發放嘅。呢個亦都係由於精算師喺呢啲區域經驗裏面呢，得出呢提前攞咗嘅錢呢，佢嘅金錢時間價值係有一種計算方式嘅。因為有一啲比較好技術性嘅嘢呢，可能我哋做好晒分析之後，由文字交俾主席，俾大家，可能更明白。但係我係承諾呢，因為已經超過一半人去收取呢，提前發放養老金百分比嘅計算表，進行呢個研究。同埋我哋亦都客觀咁邀請專業嘅精算師呢，進行呢個研究同埋探討。

主席，多謝。

**主席：**區錦新議員。

**區錦新：**多謝主席。

行政長官閣下：

特區政府今年第四季度會接受多房型嘅經屋申請。呢個亦都係閣下喺去年底承諾重開經屋申請嘅初衷，雖然遲咗三個季度。但係鑑於今年中政府推出嘅千五個一房一廳經屋單位，就招來咗萬五個家團申請，所以有理由相信年底嘅多房型經屋申請將會有一個好大概申請量。但係另一方面政府公佈嘅後萬九經屋計劃，一直只係得四個地段，只是得六千三百幾個單位，其中氹仔東北馬路嘅六百幾個單位係社屋，而青洲坊大廈二千三百幾個單位已經攞來提供俾萬九計劃中嘅經屋輪候戶。到目前為止可見嘅，只有筷子基兩個地段嘅公屋，即使全部劃為經屋亦都得三千幾個單位，加上萬九裏面留落來嘅五百幾個一房一廳單位，總數都只不過係唔夠四千個單位。而根據現行《經屋法》嘅規定，不論你有幾多個家團申請，當政府推出嘅經屋計劃所興建嘅經屋單位分配完成之後就申請失效。如果有兩、三萬個家團申請而政府得三千幾個單位接受申請，咁無疑係玩市民嘅嘢。要市民大費周章填寫表格、遞交大量證明文件，徒勞申請，但係喺僧多粥少之下，令到大數多申請者根本連抽籤機會都無就散隊，勞民傷財，折騰市民。

早前我哋提出咗偉龍馬路所收回嘅土地最少可以規劃過萬個公屋單位，但係政府又拒絕對呢個進行規劃。咁究竟點解唔

可以攞來規劃呢？係咪已經偷偷承諾俾其他發展商，我哋唔知道，但係如果你嘅土地唔能夠用，咁政府除咗上述呢三千幾個單位之外，究竟仲有乜嘢經屋計劃係可以供年底嘅申請，令到個供應量同申請家團嘅數量之間差距唔係咁懸殊，顯示政府重開經屋申請嘅誠意呢？

多謝。

**行政長官崔世安：**多謝區錦新議員。

主席、各位議員：

我諗關心經屋土地供應量同埋回收偉龍馬路嘅土地。咁我先再講講偉龍馬路嘅土地。正如我頭先同大家解釋，現在經過咗政府嘅程序，已經收地程序我哋係正式簽署，亦都進行緊。但由於而家有一個訴訟嘅關係，提出咗，亦都是處理之中，經過諮詢法律顧問，認為先處理咗呢個訴訟關係，之後，如果真係政府勝算嘅，當然係收回土地啦，因為已經行咗喇，我哋嘅程序。收咗之後，我諗而家好關心就係解決土地資料嘅問題。咁收咗之後我哋一定會將大家嘅意見擺喺重要位置去考慮。但係今日好難話，第一，係一個訴訟，第二，點可能個訴訟都未完，經過法律顧問嘅意見認為係要保留到呢個訴訟完結喇，咁政府然後作出規劃。但係不關政府都認為居住，特別係澳門居民嘅居住權我哋係非常之重視，亦都係首先要協助低收入家庭居住房屋嘅問題。所以呢個土地如果係政府嘅，我相信喺規劃方面我哋一定會重視你哋嘅意見，因為呢個亦都好多個團體同埋議會嘅成員提出咗。係因為佢土地比較大，可以建好多單位，亦都一啲公共設施，係有利於提升我哋居民嘅素質。咁我諗喺呢度只能夠等候呢個訴訟嘅結果，亦都係諮詢過法律顧問嘅意見。

至於萬九之後曾經公佈嘅六千三之後點樣搵土地，我諗幾樣啦，一樣係現在劉司長亦都規劃緊一啲政府能夠用嘅土地，我相信成熟我哋就會公佈。另外五幅填海造地裏面，A 區嘅 137.8 公頃喺規劃裏面 2015 年完成，亦都可以建造達到一萬八千個住宅單位。所以我哋相信公屋政策我們是會維持，亦都擺喺一個重要的位置。

多謝主席。

**主席：**陳偉智議員。

**陳偉智**：多謝主席。

行政長官閣下：

受市民之所托，急民之所急，所以都係傾返頭先，跟進返有關嘅問題。關於電視頻道嘅問題，我想，記得，回顧一下就係舊年 2 月 29 號修改著作權及有關權利制度嘅呢度通過，3 月 29 號行政長官你簽署，到咗舊年 6 月 1 號，好多電視頻道因為涉及侵權，所以無咗。市民有少少怨言，但係因為要依法咁嘛，所以佢哋大家都接受嘅。由舊年 6 月 1 號到今年 7 月嘅時候，公天播放所有頻道，原則上理論上都係合法，否則嘅話特區政府喺呢段長時間裏面就係唔執法，呢個講唔通。既然係合法嘅時候，點解由有線來去將個網絡傳輸嘅時候就竟然無晒呢？呢一樣嘢行政長官你真係要返去同你嘅團隊去了解一下、研究一下。第一你可唔可以全面恢復返過往已經播開嘅頻道，6 月 1 日起至今年 7 月底播放嘅頻道全面恢復？

第二個問題就係，明年 4 月個有線專營合約滿期，咁滿咗之後點算呢？其實就係一個市場嘅開放，正好趁呢個機會還返我哋市民一個資訊嘅權利，讓有興趣經營資訊服務嘅行業你發牌俾佢。因為今次中級法院最大嘅問題就係公天無牌，又有專營嘅問題，所以佢係違反咗收費電視地面服務專營合約。無牌就違反無線電通訊法律制度及廣播業務法律制度。咁你出年 4 月開始發牌有興趣參加嘅業者，咁咪我哋嘅市民可以廣收頻道，多啲吸收資訊，又提高我哋本身嘅認知。咁希望特首能唔能夠返去又研究一下，出年全面開放頻道？

唔該晒。

**行政長官崔世安**：多謝陳偉智議員嘅問題。

主席、各位議員：

對頭先呢個問題，我答何潤生議員嘅時候我答咗一部份。我要，主要，亦都唔好意思，何潤生議員有部份我無答，而家我重申，因為兩位都問到，喺明年 4 月 21 號有線合約滿咗之後澳門的電訊政策。我諗呢個，其實，基本原則亦都訂定，未來電訊政策持開放。簡單來講我諗專營時代亦都過咗。呢個我諗係一個基本嘅政策取向。至於細則到時係點樣去公開競投，幾時可以具備條件，呢啲我諗要有待劉司長同大家去交待，因為出一個呢啲整個政策同埋安排去競投等等，可能需要一啲時間，亦都要睇本身我哋市場嘅吸引力。大家亦都唔

好忘記，喺最近開頭大家以為好多人會競投嘅固網，亦都最後出現唔係咁多人競投。所以呢個我諗讓個市場可能會更好，因為始終市場係一個營商環境界。我哋係原則去開放，亦都希望吸引到更多投資者能夠去投資，使到大家能夠喺呢個開放嘅市場裏面我哋市民更得益。

但係我諗剛才嘅問題我要重申，政府喺根據呢個裁決裏面，唔希望我哋做出來嘅事係唔符合呢個裁決，亦都唔希望我哋特區政府嘅部門出現咗違令，喺呢 90 日裏面。所以劉司長嘅團隊反覆研究，亦是，特別我哋法律嘅部門，就針對呢個裁決嘅執行做咗大量工作來到去定。

至於剛才講邊個時段違法，邊個時唔違法，我諗肯定我哋而家係執行呢個裁決裏面保證希望唔違法。過往嘅，我想，亦都是好多訴訟關係引起，現在亦都係清晰咗。我諗其實大家都係一樣，希望廣大市民能夠繼續有電視睇，但係係咪能夠睇返過去咁多頻道，政府只能努力去做，但政府亦都喺尊重裁決及守法原則去做，呢個亦係政府必須堅定要去執行嘅。

多謝主席。

**主席**：崔世平議員。

**崔世平**：多謝主席。

特首：

澳門定位作為世界旅遊休閒中心，優質嘅環境已經成為一個重要元素。我哋除咗打造一個充滿文化氣息同活力嘅旅遊環境之外，更重要係為本地居民提供舒適同宜居嘅生活環境。但係感覺而家我哋嘅環境保護工作仍然未能夠同經濟高速發展同步，咁所以想了解下呢方面嘅工作。

環境影響評估嘅環境保護工作裏面係一個相當重要嘅預防措施，世界上好多地方亦都進行咗一啲制度。雖然澳門環保局亦都係開展緊相關工作，但係佢嘅實效係未能夠顯著，佢哋嘅工作主動性亦都同市民嘅期望有所落差。值得肯定嘅就係過去政府嘅努力，已經贏得咗而家社會基本上係認同環評嘅基本共識。大部份公共部門同業界亦都明白到環評嘅重要性，有心去做好環評。但係政府所出嘅編寫環境影響評估報告書指引嘅內容又同一啲本地公佈過，或者同鄰近地區所做嘅環評報告嘅要求有所差異。

針對呢個情況，我想提出一個問題，就是面對眾多發展項目及環境問題，特區政府如何擺脫在環評上一貫的被動形象，提高工作主導性？有咩具體措施呢？鑑於目前環評工作指引仲未清晰，增加咗業界開展環評工作嘅難度，亦都減弱咗佢哋對環評工作嘅意願，想問行政當局幾時先會推出一個更具體的配套文件或參考標準？

多謝。

**行政長官崔世安：**多謝崔世平議員。

主席、各位議員：

關於環境評估制度，特區政府係堅持均衡發展同可持續發展嘅原則，所以係非常重視本地區嘅環境保護工作，亦希望與廣大居民齊心合力努力去營造優質嘅環境。建立同完善環境影響評估制度亦係科學施政理念裏面嘅環保工作體現。澳門環境保護規劃 2012 至到 2020 將其作為制度化嘅建設內容。呢十年規劃裏面，係包括咗評估制度在內嘅標準制訂、規範等等，亦都係個過程中必須要立法嘅。

構建環境影響評估制度工作一直係持續進行推進之中。09 年編製咗編寫環境影響評估報告書嘅指引，11 年亦提出咗構建環境影響評估制度嘅探索文本，12 年亦都編製咗構建環境影響評估制度嘅探索文本。環境保護局將於年內推出需要進行環評工程項目類別清單，亦都開展相關嘅環評培訓、交流及宣傳活動。相信喺 14 年會諮詢整個制訂程序、標準等等。

剛才提到同外地有唔同，或者邊啲需要進行環評。其實目前亦都希望能夠透過同業界，亦都透過工務部門加強溝通，來到達出咗剛才所講嘅類別清單，往後能夠有制訂標準、有規範，然後配備整個制度，最後亦都必須要立法。好多唔同業界近期關心到喺未立法前係唔係空白嘅情況呢？目前工務部門同環保局係進行緊相關嘅工作，亦都係已特別關心到保護本地區嘅環境。

我相信剛才提嘅係好有需要去落實規範，因為一個發展中嘅城市，如果你無一個環評嘅制度，每一項環評應該點做個標準規範，同埋同國際上係點樣。因為亦都睇到好多請咗一啲國際嘅公司來去做，咁呢個我相信係有個迫切性，希望能夠喺 14、15 年完成以上特別提到嘅工作。

多謝主席。

**主席：**高天賜議員。

**高天賜：**多謝主席。

長官閣下、各位官員、各位同事：

唔好意思長官，我無牌舉，乜嘢都舉晒，因為施政方針時候全部舉晒啦。

來之前以為好安靜，但係尋日打風，今日長官來到出面都好熱鬧。一封信想交俾行政長官嘅，關於一啲中介人一啲糊塗嘅法例造成嘅問題，希望長官……佢哋問我識唔識睇中文，局部啦，長官應該 OK 嘅。

今日嘅問題好簡單，因為早前都有同事都問過，關於年資。年資呢個問題係全世界都係根據你第一日入職就去計算嘅。當時喺草擬個法例，第一常設委員會都係講得好清楚，呢個係唔公平嘅制度、唔公平嘅做法：以法例頒佈咗之後先至計算，而唔係佢入職嘅第一日來計算。第一常設委員會寫得好清楚，但係好可惜，特區政府拖咁耐時間。長官啊，啲公務員唔係石排灣嗰度爆出嚟架，佢哋係真真正正犧牲佢嘅青春，令到佢哋真係覺得由 2011 年先至開始計嘅年資，佢一個年資都無，雖然佢有成二十至三十年嘅工年。長官，好希望對於呢件事可以作出適當盡快嘅決定，因為佢哋好快好多都會退休。同樣呢件事，同樣好多嘢都令到公務員嘅士氣低落嘅。所以希望長官由呢樣嘢開始令到真係，公務員嘅士氣真真正正見到出來，而唔係淨係得個口號。

多謝長官。

**行政長官崔世安：**多謝高天賜議員。

主席、各位議員：

剛才，我想，談及嘅問題，我亦都答陳明金議員嘅時候答咗關於呢個年資問題。高天賜議員亦都引述咗當時第一常設委員會，關於委員會關注呢個問題，認同提出嘅訴求合理，希望擴大，讓年資嘅獎金發放能以實際公職時間為依據前題，而非取決於退休及撫恤制度嘅供款。但係經過常設委員會到立法會細則性通過嘅時候，委員會喺個過程中亦都表達過呢個提升嘅

金額好、呢個份數增加好，以至到整個向前邁進，對於公務員來講，亦係有一定，佢唔係完全同等，但係亦都有進步。我相信當時喺立法會亦係大家有唔同嘅理由去表達嘅。

正如我頭先答陳明金議員嘅時候亦都講咗，大家好關心嘅公務人員公積金制度，同埋年資獎金房屋津貼及家庭津貼制度。呢個特別係公積金制度，係彌補咗好多過往唔計算在內嘅，亦都係一個進步，同時亦係一個選擇。當然公積金亦有佢嘅風險啦，你投資嘅時候高中低風險等等，或者你個人理財嘅風險，當你收一大筆錢嘅時候個理財嘅問題等等。但佢總係一個進步，為特區政府嘅公務人員福利待遇問題制訂新嘅法律來到去彌補一部份。

我好明白高議員提出嘅係要實現全體公務人員享受公平一致嘅福利待遇嘅目標，呢個亦都係同特區政府我剛才表達嘅基本上係一致。但係，如果單獨去改一個法律嘅時候，亦都會牽涉有幾個法律係需要跟進去改。我諗喺呢個階段時間，剛才已經表達咗特區政府嘅團隊喺整體上同一啲特別方面係就基層嘅公務員作出我哋嘅努力，來到希望喺短期提交俾立法會。我諗我哋繼續喺呢個方向希望透過呢啲提案幫助到基層公務員。

近期呢段時間我亦接觸咗好多基層公務員，包括咗團體、個人，亦都聽取咗好多意見。我好明白生活嘅壓力、租金嘅上升、物價嘅貴等等，但係我哋了解到之後，我哋已經落實去跟進喺調整津貼、超時，或者一啲更靈活嘅措施係咪可行，喺低收入裏面嘅津貼等等。我諗喺呢啲比較能夠靈活嘅措施裏面我哋積極去準備提案，亦都希望到時得到立法會嘅支持，讓我哋基層嘅公務員能夠得到一定嘅財政支持，去到達到佢哋嘅要求。

多謝主席。

**主席：**麥瑞權議員。

**麥瑞權：**多謝主席。

尊敬嘅行政長官閣下：

而家樓價持續暴漲，市民置業同住屋都難。唔單止基層市民受困，甚至中產階段都買唔起樓。八十後、九十後更加唔使講。政府雖然不斷咁出招抑壓樓市，但係遠水不能救近火。根

本原因係在於澳門土地資源確實稀缺，同埋政府近年又將大量土地資源低價批給博彩業有關。

近年澳粵合作不斷加強，例如澳門大學橫琴校區同埋河底隧道嘅建設等等。請問行政長官可唔可以進一步咁加強區域合作，效法橫琴澳大做法，由特區政府出錢向珠海橫琴澳大旁邊租借或者購買土地興建公屋呢？模式可以參考橫琴澳大嘅形式，即係話由澳門特區去管理嗰啲樓宇嘅範圍，以滿足澳門市民置業安居嘅需求，更可以充分利用連接兩地隧道嘅硬件配套資源。請問行政長官對呢個建議會唔會表態支持呢？

多謝。

**行政長官崔世安：**多謝麥瑞權議員。

主席、各位議員：

我諗如果呢個建議獲得通過，大部份人都支持嘅。因為澳大就係一個模式，經過人大常委正式，而家 1.09 平方公里係澳門嘅法律法規管嘅。我諗提出呢個意見同建議係非常之善意，亦都希望能夠有更多土地俾我哋澳門廣大市民來到移居。但係目前我哋喺粵澳合作框架協議好，喺呢個橫琴總體規劃好，係有一個特區政府購置土地建公屋嘅項目。目前來講就係主要橫琴澳大新校區五平方公里嘅合作產業園區。呢個完全係一個新構思，我諗大家都好歡迎嘅，如果澳門嘅面積能夠增大而又係澳門嘅法律管理，我相信係一個好受歡迎嘅建議，但係因為唔係我哋嘅合作框架協議，亦都唔係橫琴嘅總體規劃裏面，建議係善意係好嘅，但係我就唔能夠答應麥議員，即是我可以做得好，因為呢個真係係另外一個完全新嘅構思。正如剛才我今日會同大家介紹，喺合作方面，粵澳係明確珠海橫琴、廣州南沙，新嘅意向中山翠亨新區，但係喺所有大嘅同埋細則裏面係無包括到我哋叫做搵地起公屋嘅。同埋亦都好超前，我覺得麥議員就係可能諗到人嘅流量，將來我哋可能好多澳門人喺橫琴工作或者遷移這方面，但係如果能夠好似大學咁俾澳門去管呢當然係好啦，呢個真係，你增加咗面積。我諗答應呢個能夠做得成呢，我就無能力，但係呢個意向我諗亦都係好創意。因為，真係，如果有 1.09 平方公里好似澳大咁，亦都可以住到好多居民嘅。呢個真係一個善意嘅建議。

多謝。

**主席：**吳在權議員。

**吳在權**：尊敬嘅行政長官閣下：

喺你嘅秉承以人為本、陽光政府嘅理念施政下，民生得到改善，取得一定成績，係值得肯定嘅。但由於行政架構同政務不協調，對貫徹長官你的施政理念仍有一段距離。就以《房地產中介業務法》為例，法案文本最初為 29 條，經與運輸工務官員細則性討論達到一個共識，交出文本為 57 條。但遺憾過咗半年多仍未見新文本。經小組主席屢催之下，擲返嚟嘅又變為 39 條，到最終係 44 條通過，但已延耗一年半時間。雖然係四催文本，易文本，但卻刪除執法實體的不明確等。

由於社會上長時期強烈訴求望有此法律，本人基於此投下贊成票。但實質反映出行政體制與政務不協調因素導致法律粗疏，行政法規頒布及條文均未能結合實情，困擾房地產中介人及經紀人，產生不少迴響。呢度有一些佢嘅簽名，我想呈交給行政長官，請多啲關心。

長官去年回答本人提問時指出，已委託政策研究室評估特區政府架構，推出領導主管官員的績效評估，由此可見長官是具施政為民及標本兼治的決心。因此，本人想請問長官閣下：特區政府明年換屆在即，到底長官會有怎樣的創新思維，去優化五司行政架構及官員問責，為各級官員、施政團隊更有效修身？怎樣深化領導主管績效評估，為明年更好施政及為下一屆特區政府創設條件，施政為民作準備？

多謝長官。

**行政長官崔世安**：多謝吳在權議員。

主席、各位議員：

我諗我哋喺社會上亦都聽到好多意見，喺議會亦都聽到議員好多意見。正如剛才亦都睇到，對特區政府嘅評分好，對政府嘅信任好，我諗總嚟講，可喜嘅就係大家係支持同俾機會特區政府繼續向前工作。我哋亦都好虛心，係應該聽取批評嘅意見同點樣完善我哋嘅機制。我諗喺立法工作方面，喺我哋施政方面，依然係有好大空間去進步。呢個我作為行政長官亦都應該定時去檢討反思，聽取大家意見，希望能夠施政效率係喺而家嘅基礎上更能夠提高。

喺過往三年多，喺施政裏面亦都係根據施政嘅方針亦完成咗正如吳在權議員所講一系列嘅工作計劃，但係喺正如我講立

法好、施政過程之中好，當然亦有好多空間我哋去檢討，去改善。

你問到我有冇好嘅意見會匯總俾下一屆呢，我諗呢個係一個好好嘅課題俾我自己去準備開始去做。我諗幾個方面都係好值得，剛才吳議員提出嘅，一個呢，特別我相信你關心嘅就係我哋嘅行政文化改革，呢一種文化點樣能夠與時俱進，我哋嘅施政點樣能夠理念一致，齊心真係有效咁樣能夠做到讓全社會能夠得到呢個，滿意團隊嘅表現。喺呢幾年嘅過程中亦都睇得到，雖然我哋著眼喺大局整體嘅推進，但係亦都有好多方面係睇得到我哋係有好多空間值得我哋去改善。正如我講，頭先今日喺立法會答問講到我哋嘅立法工作、立法統籌，以至到我哋嘅執行，喺呢一兩年亦都同特別係陳司長反覆研究點樣能夠做好統籌立法嘅工作，與立法會一起能夠努力咁樣工作。特別高興係喺一兩天前，幾個重大嘅法律細則性通過，亦都作為喺呢一屆立法會大家睇到盡咗好大嘅努力。因為我哋反覆去修改又好，符合大眾的要求好，聽取議員意見好，亦都做咗大量的工作。但係喺呢個過程之中，亦都汲取咗好多經驗，同埋呢，特別譬如有啲法律已經行使咗三十年，我諗係與時俱進同埋有必要修改。

喺未來嘅日子裏面，我哋會更加努力，特別喺立法嘅工作，喺呢段時間亦都準備咗多項法案嚟新一屆立法會會期開展之後提交，我哋希望喺呢方面都是有所進步。至於喺我哋嘅行政架構方面，亦都汲取咗一定嘅經驗，喺結構上好、係個管理上好、喺個績效上好，最後去到政治問責好，我哋都會作出一定的改善，來到希望能夠俾一個好嘅意見下一屆喺個效率方面有所提升。

多謝主席。

**主席**：好，請歐安利議員發言。

**Leonel Alberto Alves**: Sr. Presidente, muito obrigado; Sr. Chefe do Executivo, Exa.;

A RAEM tem conseguido desempenhar o seu papel de plataforma para as relações económicas e comerciais entre a China e os países de língua portuguesa. Os números não enganam e os resultados comerciais alcançados entre os diversos parceiros envolvidos têm sido positivos.

Há, porém, um aspecto em que Macau pode fazer mais e melhor no fortalecimento da ligação da sua população a este projecto nacional e regional.

No campo das relações entre a China e os países da língua portuguesa há diversos outros domínios de cooperação que podem ser aprofundados e Macau deve também tomar a iniciativa, incentivando os diversos sectores, sobretudo a população jovem a formar-se e a procurar outras oportunidades de desenvolvimento profissional.

Gostaria aqui de perguntar ao Sr. Chefe do Executivo qual a sua opinião sobre o assunto, o desenvolvimento dum programa que tenha por objectivo tutar Macau de profissionais capazes de colaborar nestas relações China-Países de Língua Portuguesa em áreas como por exemplo Direito, a Economia, Administração Pública, o ensino, as engenharias e convidar as instituições de ensino superior da RAEM a criar oportunidades de formação superior para todos aqueles que desejem, no futuro, trabalhar com estes Países de expressão portuguesa e a China, em áreas de prestação de serviços diversificadas. Muito obrigado, Sr. Chefe do Executivo.

(**歐安利**：行政長官閣下：

澳門特別行政區在中國和葡語國家的經貿關係上一直擔當著平台的角色。

數字不能欺騙人，而且不同夥伴之間已達成的商貿成果一直是正面的。

然而澳門還可以在以下方面做得更多和更好：就是加強本地人與這一國家和地區計劃的聯繫。

在中國和葡語國家之間的關係上，還有其他不同的合作領域可以加以深化，而澳門還應採取主動，鼓勵不同界別，尤其是年青人裝備自己和尋找發展專業的其他機會。

在此，請問行政長官閣下對如下事宜有何意見：開發一個計劃，使澳門具備法律、經濟、公共行政、教育和工程等方面的專業人士能在中國和葡語國家的關係上提供協助，並邀請澳門特區的高等教育機構聯同政府和民間社會，為有志將來在中國和葡語國之間的多元服務範疇工作

的所有人士創造高等專業培訓機會。

多謝。)

**行政長官崔世安**：多謝主席，多謝歐安利議員所提出嘅問題。

作為中國與葡語系國家經貿交流嘅平台，葡語同中葡雙語人才嘅培養係好重要嘅。今年亦都又會舉辦中葡論壇部長級會議。喺過去嘅交流裏面亦都非常希望澳門繼續扮演呢個重要嘅角色，作為培訓葡語人才、中葡雙語人才嘅一個基地。

喺 11 年，中國對葡語國家經貿合作論壇，澳門嘅培訓中心正式成立，亦都體現咗中國政府同埋各葡語國家對人力資源開發合作嘅重視同支援。喺呢個培訓中心成立之後，亦先後開辦超過 20 個研修班，當中包括咗旅遊、醫療衛生、法律、語言、行政同管理等，來自七個葡語國家超過 300 人參加。事實上呢啲課程一直亦有預留部份名額讓我哋澳門居民去修讀。所以我諗剛才所提出嘅一個整體規劃，其實我哋已經有唔同嘅機構同單位做緊，特別係關係到參與法律、經濟、公共行政、教育同工程人才。

我諗呢個其實，如果能夠成為一個整體嘅計劃，喺澳門嘅高等教育機構落實同執行，亦有利於推進雙語嘅。呢個我會同張裕司長研究一下，點樣能夠整合之後，有一個，譬如，舉例，五年嘅計劃，有利於去培訓。但係我哋而家好多有利嘅條件，包括我哋嘅高等院教有培訓葡語中心，我哋非高等學校亦有教授培訓葡語嘅基本課程設置同老師，亦都喺中國對葡語系國家方面我們亦有培訓中心。所以我相信有利去做嘅，我哋亦都願意探討去做。

多謝主席。

**主席**：好，行政長官閣下、各位官員、行政會嘅成員、各位議員：

如果無特別事情要召開特別會議嘅話，恐怕今日就係我最後坐喺呢度主持會議。

本人自從 1984 年開始就擔任立法會嘅議員，至今將近三十年。特區成立之後，承蒙各位議員嘅信任，本人擔任立法會嘅副主席，最近四年擔任立法會主席。本人嘅工作得到咗全體議

員、立法會執行委員會、行政委員會以及立法會輔助部門各位同事嘅大支合作同支持，藉住呢個機會，本人向各位議員同埋各位工作人員表示衷心嘅感謝！

多年嚟，立法會嘅工作亦得到咗行政長官嘅大力支持，同埋有關行政部門嘅積極配合。傳播媒界嘅朋友同廣大市民對我哋立法會勤加指導同鞭策，對此，本人也特別表示衷心嘅感謝！

再過一個月，特區新一屆立法會就會誕生，就會選舉誕生新一屆立法會。我哋在座有啲議員已經報名參選下一屆立法會，喺呢度我祝賀參選嘅議員都能夠繼續喺新一屆裏面坐喺呢個會堂嘅席位上面，繼續為澳門廣大市民，繼續為澳門嘅發展同進步，繼續努力，作出更大嘅貢獻。

喺呢度我祝大家工作進步，身體健康！

會議到此結束。

多謝大家。

請行政長官。

**行政長官崔世安：**尊敬嘅劉焯華主席、各位議員、各位同事、各位傳媒嘅朋友：

剛才劉主席表達咗佢嘅感受，亦都咗表達佢今天如果無特別嘅情況下同我講主持最後一次，特別我來答問嘅大會。喺呢度我首先要代表澳門特別行政區政府衷心感謝劉焯華主席同埋各位議員嘅關心支持特區政府嘅工作。亦借今天嘅機會，特別要感謝劉焯華主席。

我係好有榮幸同劉主席好多年嘅好朋友，亦共事咗好多年，佢對我，特別從 90 年開始有一種亦師亦友嘅感覺。喺咁多年來，佢無論對我嘅工作，對我嘅個人都係從來關心支持。我亦都好希望借今天要衷心祝願劉主席未來生活愉快，喺佢喜愛嘅澳門裏面繼續同我哋一齊，俾好嘅意見我，亦都支持我。

亦借今天機會，因為本屆立法會我最後一次來到呢個答問大會，喺今日亦都聽咗大家好多寶貴意見，我亦都好坦誠回應大家，我同我嘅團隊嘅施政方針、理念同工作。我亦都希望喺來一屆立法會能夠繼續我哋團隊同立法會同共努力工作，為澳門特別行政區嘅發展繼續共同努力。

喺呢度請容許我代表政府再一次多謝劉焯華主席，多謝各位議員。

**翻譯：**翻譯辦公室

**文牘：**紀錄及編輯辦公室